

四庫全書

子部

欽定四庫全書

子部

御定淵鑑類函卷七十三至
五

詳校官宗人府庶常寶光纂

主事臣祁韻士覆勘

總校官檢討臣何思鈞

校對官中書臣金光悌

騰錄監生臣繆暉吉

欽定四庫全書

御定淵鑑類函卷七十三

設官部十三

尚書總裁
尚書令

銓尚書

尚書總裁一

原杜氏通典曰昔堯試舜於大麓領錄天下事似其任也周之司會又其職焉鄭玄注周禮云司會若今尚書秦時少府遣吏

四人在殿中主發書故謂之尚書尚猶主也漢承秦制及武帝遊宴後庭始用宦者主中書以司馬遷為之中

間遂罷其官以為中書之職至成帝建始四年罷中書
官者又置尚書五人一人為僕射四人分為四曹通掌
圖書祕記奏章之事及封奏宣示內外而已其任猶輕
至後漢則為優重出納王命敷奏萬機蓋政令之所由
宣選舉之所由定罪賞之所由正斯乃文昌天府衆務
淵藪內外所折衷遠近所稟仰故李固云陛下之有尚
書猶天之有北斗北斗為天喉舌尚書亦為陛下喉舌
斗斟酌元氣運平四時尚書出納王命賦政四海

賦布也

令及左丞總領紀綱無所不統僕射及右丞分掌廩假

錢穀

隋志曰令統領之僕射副令又與尚書分領諸曹

漢初尚書雖有曹名不

以為號及靈帝以侍中梁鵠為選部尚書於是始見曹

名總謂之尚書臺亦謂之中臺

吳諸葛恪既定山越孫權使尚書僕射薛綜勞

軍曰故遣中臺近

大事八座連名而有不合得建異議

官迎致犒賜云

自順帝永建元年初令三公尚書

二漢皆屬少府

蔡質漢儀

入奏事其八座具歷代尚書中

曰凡三公列卿將大夫五營校尉行複道中遇尚書令僕射左右丞郎御史中丞侍御史皆引車先相迎避衛

士傳不得近臺官臺官過乃得去至晉宋以來尚書官上朝及下禁斷行人猶其制也

魏置中書

省有監令遂掌機衡之任而尚書之權漸減矣晉以後

所掌略同八座丞郎初拜並集都省交禮遷職又解交

本漢制也至於晉宋惟八座解交丞郎不復解交也

梁陸

果遷尚書殿中曹郎拜日八座丞郎並到上省交禮而果至晚不及時刻坐免官

宋曰尚書寺

居建禮門內亦曰尚書省

今若闕則左僕射為省主

亦謂之內臺每

八座以下入寺門生隨入者各有差不得雜以人士凡

尚書官大罪則免小罪則遣出遣出者百日無代人聽

還本職

宋顧琛為庫部郎以顧碩寄尚書張茂度聞名而碩與同席坐琛坐此遣出又宋制曰今朝

士詣三公尚書丞郎詣令僕射尚書丞郎並門外下車履度門闕乃納履也

其令及二僕射

出行分道之制與中丞同令僕各給威儀十八人

說在御史

大夫

自晉以後八座及郎中多不奏事梁天監元年詔

曰自禮闈陵替歷茲永久郎署備員無取職事糠粃文

案貴尚虛閑空有趨墀之名了無握蘭之實曹郎可依

昔奏事自是始奏事矣又詔尚書中有疑事先於朝堂

參議然後啓聞舊尚書官不以為贈惟朱异卒特贈右

僕射武帝寵之故也

周捨問劉杳尚書官著紫荷相傳云挈囊竟何所出答曰張安世傳

云囊簪筆事武帝數十年注云囊橐也近臣簪筆以待顧問

自魏晉重中書之官居

喉舌之任則尚書之職稍以疎遠至梁陳舉國機要悉

在中書獻納之任又歸門下而尚書但聽命受事而已

後魏天興元年置八部大人於皇城四方四維面置一

人以擬八座謂之八國各有屬官分尚書三十六曹及

諸外置令大人主之

崔元伯通署三十六曹如今僕統事

四年又復尚書

三十六曹天賜元年復罷尚書三十六曹別置武歸修

勤二職分主省務

武歸比郎中修勤比令史

至神麀元年始置僕射

左右丞及諸曹尚書十餘人各居別寺

舊例尚書簿諸曹須即出借任

城王澄為尚書時公車署以理冤事奏請直案澄執奏以為尚書政本特宜速慎故凡奏所事問道通之蓋以祕要之切防其宣露寧有古制所重今反輕之宜繕寫其事意以付公車詔從之北齊尚書省

亦有錄令僕射總理六尚書事謂之都省亦謂之北省

後濟北王以太子監國立大都督府與尚書省分理衆

事仍開府置佐

顯祖特崇此官以隋王守侍中攝大都督府長史

後周無尚書

隋及唐皆有其制略同凡尚書省事無不總龍朔二年

改尚書省為中臺咸亨初復舊光宅元年改為文昌臺

垂拱元年改為都臺長安三年又改為中臺神龍初復

為尚書省

亦謂之省臺

都堂居中左右分司

舊尚書令有大廳當省之中今

謂之都堂都堂之東有吏部戶部禮部三行每行四司左司

統之都堂之西有兵部刑部工部三行每行四司右司

統之凡二十四司分曹共理而天下之事盡矣

故事叔父兄弟

不許同省為郎官格令不載亦無正敕貞觀二年十一月韋叔謹除刑部員外三年四月韋季武除主爵郎中其年七月韋叔詣除庫部郎中太宗謂曰知卿兄弟並在尚書省故授卿此官欲成一家之美無辭稍屈階資其後同省者甚多近日非恩除拜即須相迴避當以準今同司曹判及公檢之官不得用大功以上親若制敕

受者即申所司從早改擬遂同別省亦罷也

左右僕射各一人

總統省事

左丞一

人掌轄吏部戶部禮部十二司事

右丞一人

掌轄兵部刑部工部十二司事

左右司郎

中各一人負外郎各一人

各掌副左右丞所管諸司事

尚書六人

吏戶

禮兵刑工六部各一人

侍郎九人

吏部戶部兵部各二人餘各一人

郎中二十八

人吏部戶部兵部刑部各二人餘

負外郎二十九人

吏戶

兵刑四部及司勳各二人餘司

都事六人

以下各有差

增

文獻通考曰五代時尚書都省在興國坊今梁太祖舊

第宋太平興國中徙於利仁坊孟昶舊第頗弘麗中設

都堂左右司左右丞郎中員外郎聽東西廊分設尚書
侍郎廳事二郎中員外廳事六掌施行判命舉省內綱
紀程式受付六曹文書廳內外辭訴奏御史失職考百
官府之治以詔廢置賞罰曰吏部曰戶部曰禮部曰兵
部曰刑部曰工部皆隸焉凡天下之務六曹所不能與
奪者總而決之應取裁者隨所隸送中書省樞密院事
有成法則六曹準式具鈔令僕射丞檢察僉書送門下
省畫聞審察吏部注擬文武官及封爵承襲賜勲定賞

之事朝廷有疑事則集百官議其可否凡更改申明敕令格式一司條法則議定以奏覆太常考功謚議亦如之季終具賞罰勸懲事付進奏院頒行於天下大祭祀則誓戒執事官設官九尚書令左右僕射左右丞左右司郎中貳外郎各一人分房十曰吏房曰戶房曰禮房曰兵房曰刑房曰工房各視其名而行六曹諸司所上之事曰開拆房主受遣文書曰都知雜房主行進制敕自班簿具貳考察都事以下功過遷補曰催驅房主考

督文牘稽違曰制敕庫房主編檢敕令格式簡納架閣

文書 紹聖二年詔在京官司所受傳宣內降隨事申

尚書省或樞密院覆奏又詔尚書都省彈奏六察御史

糾不當者 事文類聚曰宋初鑑藩鎮之弊以尚書郎

曹出領外寄尚書侍郎郎中貲外郎皆為空官往往他

官兼領熙寧詔新官制以六曹尚書侍郎為長貳元祐

置權尚書 續文獻通考曰宋度宗咸淳八年起居舍

人高斯得奏六曹尚書選用宜在得人其略曰尚書猶

天之有北斗為天喉舌斟酌元氣運平四時信乎其為
天下樞要也其長官則有令有僕射漢或以大將軍領
尚書事其下有左右丞有六曹尚書蓋以萬機之繁故
衆建官屬以綜理之章帝時韋彪上疏謂天下樞要在
於尚書間者多從郎官超陞此位彪特指六曹尚書耳
若錄公及令僕乃百僚之長非彪之所指也是時諸尚
書多以苛刻為能故又云天下樞要在尚書今超陞此
位者徒曉習文法察察小慧而無大能夫樞要之地必

忠厚純實知國家大體者然後可以綜理萬務補偏救

弊為國家輯安靜和平之福消苛澆刻覈之風也今之

彌綸省局者固亦得人然韋彪所言或尚有之又徘徊

觀望不敢剴浚使樞要之地壅塞不通此今日之大患

也 遼南面尚書省太祖嘗有左右尚書其後更設曰

尚書令曰左僕射曰右僕射

見宰相目

曰左丞曰右丞曰左

司郎中曰右司郎中曰左司負外郎曰右司負外郎

金初尚書省設尚書令一員正一品總領紀綱儀刑端

揆左丞相右丞相各一員從一品平章政事二員從一

品為宰相掌丞天子平章萬機

見宰相目

左丞右丞各一員

正二品參知政事二員從二品為執政官為宰相之貳

佐治省事

見宰相目

左右司郎中員外郎各一員

制見尚書左右司郎

中初入朝時執政官親執奏目天德二年詔以付左右

郎中為定制廢帝正隆二年九月罷尚書省直省令

吏出為外官元世祖至元七年立尚書省八年并入

中書二十四年復置詔天下除行省與中書議行餘并

聽尚書省從便以聞二十八年復罷武宗至大二年復

立四年復罷入中書省 明初置六尚書非古也自秦

變周法天下之事皆決丞相府置尚書於禁中有令丞
掌通章奏而已漢初因之職屬少府成帝時始置尚書

五人是為五曹及後漢光武親總吏職天下事皆上尚

書與人主參決乃下三府尚書令為端揆之官又分為

六曹凡庶務皆會而決之以後職權益重部分日詳魏

有五尚書晉有六尚書渡江以來定為吏部祠部五兵

左民度支凡五尚書歷宋齊梁陳又加都官凡六尚書
類隨宜建置無有常典惟隋制準為吏戶禮兵刑工六
部尚書歷唐宋相因不改然較之周官六典猶有未盡
協者蓋周典六卿分職不相混壓而隋唐宋則為尚書
省之屬官故結銜云尚書某部某官其稱尚書者省名
也明初因前代之制置中書省設左右丞相等官天下
政事皆由之出其屬有四部分治錢穀禮儀刑名營造
之務太祖洪武元年始置吏戶禮兵刑工六部俱正三

品衙門定尚書正三品侍郎正四品仍屬中書省至十三年鑑丞相胡惟庸等壅蔽革中書省於是中書之政分於六部又分大都督府為五而攝其樞要於兵部陞尚書正二品左右侍郎正三品雖並稱政府而名位不極事權不專天子之威福無下移蓋隱然周世六官之職而獨冢宰不制國用司徒不掌邦教以此小異耳弘正以還內閣日益重而六尚書日益輕然老臣勲業稍重加三孤東宮三師若吏兵之長猶能與之抗至分宜

之得政江陵之當國則部臣唯唯聽命矣

尚書總載二

原初學記按叙尚書秦置也

天文志斗魁六星曰文昌宮荀綽云尚書是謂文昌

天府也

漢因之

漢猶隸少府魏晉以後政歸臺閣故不復隸矣

故尚書為中臺謁

者為外臺御史為憲臺謂之三臺齊職儀云魏晉宋齊

並曰尚書臺五代史志云梁陳後魏北齊隋則曰尚書

省又韋昭辨釋名曰尚上也言最在上總領之也辨

云尚猶奉也百官言事當省案平處奉之故曰尚尚食

尚方亦然 應劭漢官儀曰尚書唐虞官也書曰龍命
汝作納言朕命惟允 漢明帝詔曰尚書蓋古之納言
出納朕命機事不密則害成可不慎歟 漢書百官表
曰成帝罷中書官初置尚書負五人如淳曰主天子文
書曰尚書如主壻曰尚主 桓子新論曰昔堯試舜於
大麓者錄天下事如今之尚書官矣宜得大賢智乃使
處議持平焉 謝承後漢書曰朱穆為尚書讜言正直
華嶠後漢書韋彪疏曰欲急民所務當先除其患其

原在尚書典樞機天下事一皆決之不可不察 東觀
漢記曰章帝東巡過任城乃幸鄭均舍敕賜尚書祿以
終其身故時人號為白衣尚書 魏志曰陳羣為尚書
制九品為官人之法羣所建也 王昶考課事曰尚書
侍中考課一曰掌建六材以考官人二曰綜理萬機以
考庶績三曰進視惟允以掌讜言四曰出納王命以考
賦政五曰罰法以考典刑 齊職儀曰尚書六人品第
三秩六百石進賢兩梁冠納言絳幘朝服佩水蒼玉執

笏負荷

尚書總載三

原中臺

上省

上詳前叙
門內路西即尚書

十洲記曰崇禮門在東掖

禮門內即尚書
令下舍之門

天府

仙臺

上詳前叙
漢官志云尚書省在神

仙門內王筠和劉尚書詩曰
客館動秋光仙臺起寒霧

天閣

禮閣

宋元嘉起
居注曰尚

書左丞袁璠啟領曹郎中荀萬秋每設事緣私遊肆其
所之豈可復參列士林編名天閣請免萬秋所居官

李充懷愁賦曰在中秋之
遙夜兮直崇禮之禁闌

天臺

畫省

傅玄答卞壺
詩序曰尚書

左丞彈八座以下居萬事之會斯乃皇朝之司直天臺
之管轄 蔡質漢官典職曰尚書奏事於明光殿省中

畫古烈士
重行書讚

司會

文昌

周禮天官司會之職鄭玄注曰會大計也司會主天下之

大計計官之長若今之
尚書矣

出納詔命

通掌圖書

漢書解詁

曰尚書出納詔命齊
衆喉舌

謂之八座

分為四曹

續漢書云光武

帝分增三公曹為二公其一曹主歲盡諸州郡事常侍
曹主選舉祠祀民曹主繕功作鹽池苑囿客曹主護駕
羗胡朝賀二千石曹主詞訟中都官主水火盜賊與三
公為六曹并一令一僕二人謂之八座

下詳通典

即古六卿

制法九品

魏志曰魏世事統臺閣重內輕外故八座尚書即古

六卿之任也
衡虛久居斯位
不忝厥職

謹言正直

方毅廉貞

謝承後漢書朱穆為尚書謹言正直
續漢書黃琬方毅廉貞為尚書

魏朗謇諤

荀

親寬敏

謝承後漢書曰魏朗字少英入為尚書再升紫微審諤禁省不屈豪右又荀親字伯條拜尚

書親性明寬敏於衆職以厲羣僚秉機平正直道而行是時内外公卿大夫莫不敬憚

宜擇溫

厚

妙選德望

唐高馮傳貞觀初上五事曰如尚書八座人之所責成者也宜擇溫厚修潔者

任之尚樸素草浮偽使家識孝慈人知廉恥自然禮節興矣通鑑玄宗欲用牛仙客為尚書張九齡諫曰不

可尚書古之納言有唐以來多用舊相居之不然歷踐内外清貴之地妙選有德望者充之仙客本河湟一使

典耳拔升清流齒班常伯此官邪也

舉觴見屬

上疏薦拜

北史曰後魏肅宗舉

觴謂羣臣曰袁尚書朕之杜預故以杯屬元凱時坐者莫不仰羨後漢左雄虞詡上疏薦之曰雄有王臣蹇

蹇之節宜擢喉舌之官由是拜尚書

尚書總載四

原唐虞曰納言周官為內史

漢官解詁云唐虞曰納言周官為內史機事所總號

令攸

管主喉舌

尚書注曰納言管主喉舌也

王之喉舌

見揚雄箴

典機密

應劭漢官儀云尚書唐虞官也漢尊此官典機密也

統庶事

應劭云侍中主喉舌

萬機無不理尚書統

萬事之本

晉康帝起居注詔曰尚書萬事之本朕所

庶事官人垂法憲

責成也而廩秩儉薄甚非治體今雖軍國多費不為

元凱惜祿其依令僕給尚書各親信五十人廩賜

八座之任

晉書蔡謨為尚書上疏讓曰八座之任非賢

清節令才少著名望臣守小郡名輩不同階級殊懸今

猥以輕鄙超倫踰等上亂聖朝魚貫之序下違羣士準

平之論豈惟微臣其亡之

士之權貴

漢官解詁云士之權貴不過尚

書

士之樞機

皇甫謐集云尚書大士之樞機也

出入王命

傅子曰尚書出

入王命喉舌之任也

補我袞闕

摯虞尚書箴曰山甫輔周靡剛靡柔補我袞闕闡我皇猷

八元八凱

左傳云昔高陽氏有才子八人蒼舒璘欽椅戴大臨危降庭堅仲容叔連齊聖廣淵明允

篤誠天下之民謂之八凱高辛氏有才子八人伯翳仲堪叔獻季仲伯虎仲熊叔豹季狸忠肅共懿宣慈惠和天下之民謂之八元齊職儀曰舜舉八元八凱今號八座為元凱謝靈運晉書曰八座參攝百揆古元凱之任

尚書總裁五

原箴漢揚雄尚書箴曰允敕百工命作齋慄龍惟納言

樞機是密出入王命王之喉舌獻善宣美而讒說是折
我視云明我聽云聰載夙載夜惟允惟恭故君子在室
出言如風

原諫晉潘岳庾尚書諫曰寬而能懷威而不猛化行如
形民應如影曠曠虛坐翩翩元幕几筵生塵空館寥廓
盧諶尚書武強侯盧府君諫曰諶罪重五獄釁深四
海身不灰滅延於家門方今斬焉在疚死已無日大懼
先意遺烈將墜乎地固極之哀終不宜寫是以忍在草

土之中撰述平素之迹曰篤生我君天挺賢俊弘闡大
風光隆洪胤蔚矣其姿綽乎其韻天不予晉厄運時臻
陽九之會雖聖莫振君實振惶國難是圖跋履山川東
征西徂方協遐任言復皇輿不見楚申致命郢都徃古
來今自遠及近凡在喪親猶思俱殞况我荼毒靡經不
盡日月逾邁寒暑代遷恩慈彌遠窮思日纏撰述遺迹
臨文煩冤

原銘梁張纘故左民尚書忠子沈僧旻墓誌銘曰漸東

振古龜組三襲政若解繩吏如燥濕十升龍管四至九卿居高首暎比德腰明

原表梁沈約讓五兵尚書表曰臣聞百舍之趙非宿春所資千里之越豈一葦能泝何者裝輕適於路遠舟弱疲於濟深醜貌頽容不藉鑑於溜水驚足蹇步終取躓於鹽車丘遲為范尚書拜表曰昔滕公移晷於泗亭陳遂留權於博進祿止一守官窮九列臣獲照秋陽取沃淮海發蒙去羝已若松喬匪富伊榮須臾至此賞參

十亂躬越五水歷覽前載孰與為匹 蕭子範為兄宗

正讓都官尚書表曰納言之授皇命所由五星懸曜差
池紫宮之曲百官根本聯曹建禮之內孔蔡詣博垂芳
於兩京陳鍾令才比肩於魏世逖望前英俯循庸薄義
無尸素理絕祗奉 徐陵讓五兵尚書表曰臣聞仲尼
大聖猶云書不盡言士衡高才常稱文不逮意臣比衰
疴自積思緒茫然頻託朋遊為裁章表雖復陳琳健筆
未盡愚懷孫惠辭人頗加煩飾所以高天緬邈弗降昭

回瞻拜絲綸更增憂憊臣雖不敏弱冠登朝伊昔承華
豫遊多士晚逢興運爰濫寵私爾時四郊多壘七雄分
爭國家制度日不暇給趙宮論受命之宜隨邑奏升壇
之禮而參聞祕計弗解單于之兵飛箭馳書未動聊城
之將不期枚乘老叟忽降時恩馮唐暮年見申明主擢
宰京邑朝坐棘林遂致洛陽無雨非比長安多盜其宜
屏錮用寘嚴科猶處名僚久為叨竊但著書天祿雖如
劉向朔望登朝轉同王隱其於朽劣尚可從容司會文

昌邈然非據

錄尚書一

原漢武帝時左右曹諸吏分平尚書奏事知樞要者始
領尚書事張安世以車騎將軍霍光以大將軍王鳳以
大司馬師丹以左將軍並領尚書事

張安世領尚書事
職典樞機以謹慎

周密自著每言大政已決輒病移出聞有詔令乃驚使
吏之丞相府問焉自朝廷大臣莫知與議也又孔光
字子夏領尚書事凡典樞密十餘年守法度修政事不
希苟合問溫室省中樹皆何木也先答以他語其謹密
如後漢章帝以太傅趙憙太尉牟融並錄尚書事尚書

有錄名蓋自熹融始亦西京領尚書之任唐虞大麓之

職也和帝時太尉鄧彪為太傅錄尚書事位在三公上

漢制遂以為常每少帝立則置太傅錄尚書事猶古冢

宰總已之義薨輒罷之

鄧彪錄尚書事後以老病上還樞密職又李固張禹張防並

錄尚書事自魏晉以後亦公卿權重者為之職無不總

晉康帝時

何充讓錄表曰咸康中分置三錄王導錄其一荀崧陸

暕各錄二條事

晉江右有四錄則四人參錄也江右

張華江左庾亮並經關尚書七條事

凡重號將軍刺史皆得命曹授用惟

不得施陳及加節宋孝武孝建中不欲威權外假省錄

大明末復置此後或置或省齊世錄尚書及尚書令並

總領尚書臺二十曹為內臺主行遇諸王以下皆禁駐

號為錄公

齊明帝為宣城王錄尚書廢帝昭業思蒸魚大官以無錄公命不與

高帝崩遺

詔以褚彥回錄尚書事江左以來無單為錄者有司擬

立優策王儉議宜有策書乃從之

王儉議以為見居本官別拜錄推理應有

策書而舊事不載中朝以來三公王侯則優策並設官品第二策而不優優者褒美策者兼明委寄尚書職居天官政化之本故尚書令品雖第三拜必有策錄尚書品秩不見而總任彌重前代多與本官同拜故不別有策即事緣情不容均之凡僚宜有策書北齊錄尚書一用申重寄既異王侯不假優文從之

人位在令上掌與令同俱不糾察自隋而無

錄尚書二

原應劭漢官儀章帝詔曰司空牟融典職六年勤勞不怠其以融為太尉錄尚書 又和帝策書曰故太尉鄧

彪元公之族三讓彌高海內歸仁為羣賢首其以彪為太尉錄尚書事百官總已以聽 又殤帝策書曰司徒

徐防以臺閣機密施政牧守其以防為太尉錄尚書事百官總已以聽 又沖帝策書曰太尉趙峻二世常典

機衡有匪石不貳之心大司農李固公族之苗忠直不

回今以峻為太傅固太尉參錄尚書事 又靈帝策書

曰故太尉陳蕃忠亮謬有不吐不茹之節司徒胡廣

惇德允元五世從政今以蕃為太傅與廣參錄尚書事

王隱晉書曰賈充為太尉錄尚書五年伐吳為大都

督吳平上遣侍中程咸犒勞增邑八千戶 晉中興書

曰明帝后庾氏為皇太后九月癸丑皇太后臨朝稱制

司徒王導錄尚書事 又太初元年詔曰會稽王體道

沖虛識理明允登顯親賢國之典也其以為丞相錄尚書入朝不趨贊拜不名劔履上殿 沈約宋書曰高祖永初三年尚書令揚州刺史徐羨之為司空錄尚書事又曰孝武帝即位以大將軍江夏王義恭為太尉錄尚書事 又曰諸公錄尚書事古制也王肅解尚書納于大麓曰堯納舜於尊顯之官使大錄萬機之政案漢氏諸吏平尚書奏事後霍光以大司馬大將軍平尚書事 傅暢故事曰何劭王戎張華裴楷楊濟和嶠為愍

懷太傅通省尚書事張華為光祿大夫尚書七條事皆
詔而後行惠帝之世太保衛瓘太宰河間王顥太傅東
海王越皆錄三省尚書祕書事

錄尚書三

原錄六條

晉中興書云會稽文孝王以錄尚書六條開府領司徒又領揚州錄尚書事公卿奏進位

丞相揚州牧

參七牒

沈約宋書晉惠帝初使尚書七牒大事經關張華有異得不識

黃鉞羽葆

宜參機衡

晉起居注云元康元年誅楊駿詔曰司徒王渾秉法從王思量弘遠歷位外內文武

勲庸著在方策宜參弼機衡以亮天工其可錄尚書事也

宜贊朝政

又太興二年八月詔司徒

荀組宜贊朝政令錄尚書給班劬六十人

初總萬機

王隱晉書云司馬景王為撫軍大將軍侍

郎都督中外諸軍錄尚書事上初總萬機正身平法朝政肅然

恒總萬機

晉中興書王導為驃

騎揚州領中書監錄尚書事時丞相參佐羅弘父母沒賊賊平不奔喪又中丞熊遠尚書周顗等以署過其事

為有司所奏道上疏請免錄中宗令曰卿恒總萬機何解錄除節而已

職典樞機外內

無間

漢書張安世拜大司馬車騎將軍領尚書事職典樞機以謹慎周密自著外內無間

處羣

僚右衆望漸服

蜀志蔣琬字公琰錄尚書事時新喪元帥遠近危悚琬出類拔萃處羣僚之右

既無戚容又無喜色神守舉止有如平日由是衆望漸服

桓焉太傅入授

華嶠後漢書桓

焉明經篤行有名稱以尚書授安帝拜太傅錄尚書復入授順帝於禁中因宴見奏宜引三公尚書入省事天

子從之

李固太尉參錄

詳太尉

司馬元顯為西錄

晉書云司

馬道子日飲醇酒而委事於司馬元顯既而孫恩乘釁作亂加道子黃鉞元顯為中軍以討之又加元顯錄尚書事然道子政無大小一委元顯時謂道子為東錄元顯為西錄西府車騎填湊東第門下可設雀羅矣

桓玄遙錄尚書事

晉中興書云元興八年桓玄用事出鎮姑孰雖名在外實遙錄尚書事也

錄尚書四

原表齊謝朓明帝拜錄尚書表曰升降玉階對揚休命六轡在手千里何偕司會天官之統尚書百僚之本弘之即庶績惟凝替之則彛倫斯斁修身踐言本慙五美

果行育德未階六正妄屬負圖之寄多謝五仁之績操
檜楫於龍津荷梓梁於雲構無以輔位明堂遺像麟閣
原啓陳徐陵安成王讓錄尚書表後啓曰臣聞間平就
國乃盛漢之常儀邨霍無官竇宗周之明典何則皇季
之重非待歷階王爵之隆自高羣辟況臣戢翼要荒亟
離寒暑進慙趙勝能定楚從退匪齊文馳免秦厄固以
內切皇心外貽家恥甘輸重餌降禮單于迺城十五如
請和辟市鄉三十聊同寶劒武夫力而獲諸原微臣還

而反諸敵瞻言馬駿著隴右之功追念曹彰克烏丸之
寇前王子弟若此勲庸偏其反而豈可勝媿

尚書令一

原杜氏通典曰殷湯制官有冢宰

伊尹制官以三公攝冢宰

君薨則

百官總已以聽於冢宰周之冢宰為天官掌邦之理六

卿之職總屬焉於百官無所不主至秦置尚書令尚主

也漢因之銅印青綬武帝用宦者更為中書謁者令成

帝去中書謁者令官更以士人為尚書令

時宏恭石顯相繼為中書

令專權邪僻前將軍蕭望之領尚書事建言以為尚書百官之本國家樞機宜以通明公正者處之武帝遊宴後庭故用宦者非古之制也宜罷中書宦者

後漢衆務悉歸尚書三公但受

成事而已尚書令主尚書曹奏下衆事而為臺主與司

隸校尉御史中丞朝會皆專席而坐京師號曰三獨坐

故公為令僕射者朝會不陞奏事天子封禪則尚書令

奉玉牒檢兼藏封之禮

郭伋遼尚書令虔職機密數納忠諫陳忠為尚書令前後所

奏悉條於南宮閣上以為故事郭賀字喬卿為尚書

令百姓歌之曰厥德仁明郭喬卿忠正朝廷上下平

左雄字伯豪為中書令自雄在尚書天下不敢謬選十餘年間稱為得人自雄掌納言多所正爾荀彧字文

若為尚書令居中持重焚毀故案奇策密謀不
得盡聞又舉荀攸可以代已後攸為尚書令 魏晉印

綬與漢同受拜則策命之以在端右故也 太熙元年詔曰夫總百揆

之得失管王政之開塞者端右之職也是以自漢以來
慎選其人議郎王戎可為尚書令 又熊遠啓曰伏見

荀組為尚書令復領荊州牧自三代以來 魏晉以下任總
來未聞以納言之官而出領牧伯者

機衡事無大小咸歸令僕 宋孝武元年詔曰尚書百官
之元本庶績之樞機丞郎列

曹局司有任自頃事無巨細悉歸令僕非
所以詔能濟業更可明體制責厥成也 齊梁舊用左

僕射美遷司空 謝朓字敬仲徵為司徒尚書令朓辭脚
疾不堪朝謁仍角巾白輿詣雲龍門謝

既見乘小 梁陳並有之後魏北齊掌彈紉見事與御史
輿就席

中丞更相廉察隋亦總領衆務唐尚書令朝服鷩冕八
旒七章三梁冠武德初太宗為秦王時嘗居之其後人
臣莫敢當故自龍朔三年制廢尚書令至廣德中郭子儀勲業既盛乃
特拜馬子儀以文皇帝曾居此位固讓不敢受增初學記曰案叙尚書令者

秦官漢因之漢官云漢初並用士人為尚書令秩二千

石後漢書百官志云尚書令一人本注曰承秦所置荀綽晉百官表注曰尚書令唐虞官也毛詩云仲山甫

出納王命王之喉舌謂此晉公卿禮秩云尚書令拜則冊命薨則於

朝堂發哀五代史百官志云尚書令至梁加秩中二千

石漢官云尚書令秩二千石公為之增置二千石秦漢秩有比二千石二千石真二千石中二千石凡四等

比二千石月得粟百石二千石月得粟百二十石真二千石月得粟百五十石其下三等雖號二千石其數實不至也唯中二千石月得粟百八十石率一歲得粟二千一百六十石中猶滿也言其滿二千石然則古三石今一至陳加品至第一其後並因之而不改自魏以來尚書令品

並第
三
原齊職儀曰秦漢之世委政公卿尚書之職掌

於封奏令贊文書僕射主開閉令不在則僕射奏下其事魏主重內職八座尚書任同六卿舜舉八元八凱以隆唐治今號八座為元凱謂曰賢能用事義如昔也

增文獻通考曰今在唐為正二品朱梁置為正一品宋
淳化三年升在三師上掌佐天子議大政奉所出命令
而行之其屬有六曹凡庶務皆會而浚之凡官府之紀
綱程式無不總焉大事三省通議則同執政官合班小
事尚書省獨議則同僕射丞分班輪奏若事由中書門
下而有失當應奏者亦如之與三公三師侍中中書令
俱以冊拜自建隆以來不除惟親王元佐元儼以使相
兼領不與政政和二年詔尚書令太宗皇帝曾任今宰

相之官已多不須置宣和七年設復置令亦虛設而已

容齋洪氏隨筆曰中書尚書令在西漢時為少府官屬與太官湯官上林諸令品秩略等待中但為加官東漢亦屬少府而秩稍增尚書令為千石然銅印墨綬雖居機要而去公卿甚遠至或出為縣令魏晉以來浸以華重唐初遂為三省長官居真宰相之任猶列三品大厯中乃升正二品入國朝其位益尊班叙至在太師之上然只以為親王及使相兼官無單拜者見任宰相帶

侍中者才五人范公質趙韓王普丁晉公謂馮魏公拯
韓魏王琦尚書令又最貴除宗王外不以假人趙韓王
韓魏王始贈真令韓公官止司徒及贈尚書令乃詔自
今更不加贈蓋不欲以三師之官贊其稱也政和初蔡
京改侍中中書令為左輔右弼而不置尚書令以為太
宗皇帝曾任此官殊不知乃唐之太宗為之故郭子儀
不敢拜非本朝也 續文獻通考曰遼南面尚書省嘗
有左右尚書其後更設曰尚書令 金尚書省設尚書

令一負正一品 元世祖至元七年立尚書省後并入
中書 事文類聚曰元尚書令一人正一品 明無尚
書令官

尚書令二

原漢書曰張安世字子孺少以父任為郎因善書令給
事尚書精力於職休沐未嘗出上行幸河東亡書三篋
詔問莫能知惟安世識之具作其事後購求得以相校
無所遺失上奇其才擢尚書令 東觀漢記曰侯霸為

尚書令深見任用樊准為尚書令明習漢家舊事周密
畏慎申屠剛為尚書令蹇蹇多直言無所屈撓 又曰

永平七年宋均徵為尚書令忠正直言數納策謀每駁
議未嘗不合上意 張璠漢書曰左雄為尚書令限年
四十先試經然後舉孝廉 續漢書曰陳蕃出為豫章
太守性方峻不接賓客徵為尚書令送者不出郭門

後漢鄭宏為尚書令前後所有補益於政者皆著之為
南宮故事 漢雜事曰尚書黃香為東郡太守乞留宿

衛拜為尚書令秩二千石 漢官儀職曰尚書令主贊

奏總典綱紀無所不統秩二千石 百官表曰尚書令

是謂文章天府銅印墨綬五時朝服納言饋進賢兩梁

冠佩水蒼玉總攝諸曹出納王命敷奏萬機 魏志曰

明帝即位進陳矯為尚書令車駕常幸至尚書門矯跪

曰陛下何之帝曰欲案行文書耳矯曰此自臣職分非

陛下所宜臨也若臣不稱其職則請就黜退陛下宜還

帝慙迴車而返 又曰太祖進荀彧為漢侍中守尚書

令 又曰裴潛為尚書令奏正分職簡名實出事使斷
官府者百五十餘條 費禕別傳曰禕代蔣琬為尚書
令以朝晡聽事其間接納賓客加之博奕每盡人之歡
後董允代之旬日之間事多讐稽允曰人之才力相懸
若此 曹羲九品議曰尚書尊官也龍作納言易曰樞
機之發榮辱之主漢和帝時南陽左雄為尚書令在位
者各自肅清時稱曰左伯豪為尚書天下皆慎選舉選
舉所知自其職也 山濤啟事曰尚書令李元遷處缺

宜得其人征南將軍羊祜體儀玉立可以肅整朝廷
王隱晉書曰樂廣為尚書令所在無當時之功譽然為
後人所思 又曰咸寧二年李膺為尚書令雖歷職內
外家室至貧儉兒病無以市藥上賜錢十萬 增魏氏
春秋荀攸字公達為尚書令從太祖征伐常謀謨帷幄
時入對子弟莫知其所言太祖每稱之曰公達外愚內
智外怯內勇外弱內強不伐善無施勞知可及愚不可
及雖顏回甯武子不能過 又曰文帝在東宮太祖謂

曰荀公達人之師表也汝當盡禮敬之攸曾病世子問疾獨拜牀下其見尊異如此

晉書荀勗守尚書令課

試令史以下覈其才能有闇於文法不能浚疑處事者即時遣出帝嘗謂曰魏武帝言荀文若之進善不進不止荀公達之退不肖不退不休二令君之美亦望於君也

宋書武帝踐阼王瑩遷尚書令時有猛獸入郭上意不悅以問羣臣皆莫能對瑩在御筵乃斂版對曰昔擊石拊石百獸率舞陛下應錄御圖武象來格帝大悅

衆咸服焉 唐書廣德元年代宗以親賢有大勲特拜
尚書令 太平廣記載五代史梁開平三年詔外尚書
令為正一品按唐典尚書令正二品至是以將授趙王
鎔此官故外之 續文獻通考曰遼蕭思話以女冊為
后加尚書令封魏王

尚書令三

原八座 三獨

上詳尚書總
下詳通典

專席

廻車

上詳通典
下詳前

二

黑輅

絳服

除廣車服儀制曰尚書令輅
車黑耳後戶 下詳尚書總

方峻

博朗

上詳前二 晉中興書刁協遷尚書令詔曰尚書令協抗志高亮才鑒博朗朕甚嘉之

在位爾

舉朝憚

上詳前二 晉中興書曰卞壹為尚書令奏王導專任無敬舉朝憚之詳

書鈔

納言憤

進賢冠

並詳前二

黑耳車

彤管珥

上詳黑輅

注 應璩新詩曰彤管珥納言貂璫表武弁

明習故事

識了舊典

上詳前二

熊逵啓曰伏見吏部以太尉荀組為尚書令領豫州組朝之素望識了舊典不應處外任

勤力

憂公

推賢進士

東觀漢記云黃香拜尚書令勤力憂公畏慎周密每用奏議所建畫未嘗

流布然執事平法常持輕類全活非一也 魏氏春秋云荀攸為魏尚書令推賢進士太祖曰二荀令之論人

益信後世

明審選舉

拔擢英俊

後漢羊陟字嗣祖拜尚書令明審選

不忘也

舉旌賢退惡 又云衛良字叔賢拜尚書令每選舉常先諮訪拔擢天下英俊及二千石長吏必依功次用之州里同郡雖有佳者避

費禕識悟

衛瑾嚴整

費禕別傳

遠嫌疑猶後他州也

云禕代蔣琬為尚書令於時戰國多事公務煩猥禕識

悟過人每省讀書記舉目暫視已究其意旨其速數倍

於人終亦不忘 王隱晉書云衛瑾拜尚書令加侍

中性嚴整以法御下視尚書若參佐尚書郎若掾屬

增使相兼官

機衡總任

洪氏隨筆宋尚書令位益尊為親王及使相兼官無單拜

者 通典魏晉以下任總機衡俱詳前一

迴天子車

受世子拜

上陳矯下

荀攸事俱詳前

北斗尊

三台隔

顏真卿集尚書北斗尊楊誠齋送顏尚書詩聽履

星辰北斗寒三台只隔寸雲間周家冢宰均四海漢制尚書本百官

才包武庫

位冠

文昌

晉杜元凱為尚書才略縱橫無所不有當時號為杜武庫武后先宅改尚書省為文昌臺

司喉舌

領搢紳

杜甫詩北斗司喉舌東方領搢紳持衡留藻鑑聽履上星辰

蔣

公神宇

荀令異香

蜀志蔣琬為尚書令時諸葛武侯新歿琬處羣寮之右既無戚容又

無喜色神宇端然詳錄尚書下襄陽耆舊傳曰劉季和云荀令君至人家坐處三日香

紫極八

座

丹屏六曹

唐授李承嘉尚書制曰紫極八座非德莫居丹屏六曹惟賢是授

尚書令四

原古之冢宰

晉公卿禮秩云尚書令古之冢宰荀勗集云昔六官所掌冢宰為首秦公卿贊以丞

相御史為冠今者尚書令總此三者非臣驚聞所宜忝竊

周之冢宰

曹嘉之晉紀云荀勗守尚

書令詔曰周之冢宰今尚書令皆古百揆之任以其亮
采惠疇熙帝之載實允於此勗肆力先朝庸勲超格受
終之揆協於大麓
故受以此位也
憲範王猷
晉書陳郡謝石字石奴
運尚書令上疏遜位曰

尚書令國之總司總括百揆憲範王猷
式是羣辟故必簡德而拔量才而授
明習漢制書

孔光為博士選三科高第為尚書觀故事品式數歲明
習漢制及法令上甚信任之轉為僕射尚書令有詔光

周密謹慎
未嘗有過
百揆之首
晉起居注武帝詔曰尚書令百
揆之首總參機衡出納朝政治

績之所由也車騎將軍賈充忠允清正通理
經遠關
地文武謨勲弘著其以充守尚書令
端右之

重
晉書王恭傳云司馬道子集朝士置酒於東府尚書
令謝石因醉為委巷之歌恭正色曰居端右之重集

藩王之第而肆淫歌欲令
羣下何所取則石深銜之
掌曹文書
後漢百官志尚
書令一人掌凡

選署及秦下尚書曹文書衆事

條奏善政

後漢侯霸拜尚書令時無故典朝廷又少舊臣霸習

明故事收錄遺文條奏前世善政法度有益於時者皆施行之

奏崇經術

又左雄字伯豪為尚

書令奏令崇經術郡國耆儒年六十已上為郎不滿四十不得察舉若茂才異行不拘年齒帝從之

凌

謨帷幄

邳壽字伯考為尚書令朝廷有疑議常獨進見沒謨帷幄肅宗奇其智策擢為京兆尹

進善疾惡

楊淮字伯川拜尚書令秉心正直選舉高妙進善疾惡不棄毫釐

志在匡

益

晉中興書云刁協為尚書加金紫光祿大夫性剛悍志在匡益中宗甚信重之

典在樞機

謝承後漢書云王防字文始為尚書令典在樞機竭忠於國數陳便益議判時政以補闕失言旨切直多見納

省

正身機密

又云鄧儒字伯祖補尚書令正身機密不撓強臣

正色於朝

晉中興書卞壺明帝時為尚書令與王導等俱受顧命輔幼主成帝即位羣臣進璽司徒王導以疾不至壺正色於朝曰王公豈社稷之臣耶大行在殯嗣皇未立寧是人臣辭疾之時專任無敬事寢不行舉朝憚之

數犯顏色

續漢書云申屠剛拜侍御史還尚書令在尚書數犯顏正色百寮憚之常慕史鮪汲黯之

為人 數有直言

謝承後漢書云唐約字仲謙拜尚書閑習舊典質素密靜自典樞機數有直言

美策每作表疏皆自手書之不宜於外處官不言貨利之事當法不阿所私京師謠曰治身無嫌唐仲謙

號為補職

華嶠後漢書云黃瓊還尚書令習見故事號為補職

號為清能

蜀志

傳云又字伯陽為尚書令衆事無宿門無停賓歷職內外治身儉約謙靜少言為政簡而不煩號為清能然持法刻深好用文俗吏故居大位聲名損於郡縣

張修朝無秕政

謝承後漢書云張修字子

慎拜尚書令有故官下卿刺史二千石為讒謗所廢者
以次徵用奏罷中官貴臣子弟在官者國教肅清朝無
政秕

周榮盡心奉職

東觀漢記云周榮為尚書令在納言管樞密盡心奉職夙夜不怠

沈勲名冠百寮

會稽先賢傳曰沈勲字子異徵詣南宮賜酒拜尚書令持節臨辟雍名冠

僚
百
呂乂節儉自守

荊州先德傳云呂乂為尚書令躬親萬機清白廉素不畜婦妾車馬

之好以節

謝石脚疾於府綜攝

晉中興書云謝石遷尚書令石上表以脚

儉自守

疾不敢朝拜乞依故尚書王

王述患脚於府攝事

徐廣

彪之例於府綜攝詔從之

晉紀云王述不拜中書監患

脚就拜尚書令於府攝事也

軍國大事悉與籌焉

魏志

荀或為漢侍中守尚書令常居中持重
太祖雖征伐在外軍國事皆與或籌焉

朝之大事無

不得判

晉中興書琅邪王錄云王彪之字叔虎遷尚書令與謝安共掌朝政安數稱曰朝廷大事衆人

所不能決者咨之

王公無不立判也

增呼為筆公

後魏尚書令古弼頭銓帝常呼為筆公

飛白題尚書壁

宋書王僧虔為尚書令嘗為飛白書題尚書壁曰圓行方止物之定質修

之不已則溢高之不已則慄弛之不已則躓引之不已則迭是故去之宜疾當時嗟賞以比座右銘

尚書令五

原箴晉摯虞尚書令箴曰明明先王開國承家作制垂
憲仰觀列曜俯令百官政用罔憊昔舜納大麓七政以
齊內成外平而風雨不迷山甫翼周靡剛靡柔補我衮

職聞我王猷王猷允塞而四海咸休雖曰聖明必賴良材無曰我智官不任能發言如絲其出成綸千里之應樞機在身世季道缺天網縱替既無老成改舊法制法制不循不長厥裔尚臣司臺敢告侍衛

初學作
張華

原碑後漢潘勗尚書令荀彧碑曰夫其為德也則主忠履信孝友溫惠高亮以固其中柔嘉以宣其外廉慎以為己任仁恕以察人物踐行則無轍跡出言則無辭費納規無敬辱之心機情有密靜之性若乃奉身蹈道勤

禮賁德後之事間匪云予克然後教以黃中之叡守以
貞固之直注焉若洪河之源不可竭也確然若華嶽之
停不可拔也故能言之斯立行之斯成身匪隆污直哉
惟清素網用亂廢禮復經於是百揆時序王猷允塞告
厥成功用俟萬歲

原表後魏溫子昇代臨淮王彧謝封開府尚書令表曰
臣道媿山東氣慙隴右激水弗功搏風無力但以平原
帶地資緒極天發趾自高理翮以遠出臨侯服既乏刺

舉之能入踐帝閭又無應對之美空復受戈清廟推轂
朱門孝闕淚河功慙汗海大寶遠降橫草未樹顧以有
涯願言知止 又為魏南陽王元寶炬讓尚書令表曰
臣聞立而托乘乃成致遠之功坐以運舟遂有利涉之
用若以輕任重課憑虛責實雖欲自勤終焉靡效 梁
范雲為柳司空讓尚書令初表曰陛下繼明南面復垂
顯錄增榮益觀豈測身限而露不廣海塵不增山微物
知止敢忘自退誠以懷音感遇久妨藝序尸祿昧寵取

蹈風歌中寐軫心方餐凝慮寧可冒釐綜之重負學製
之談將玷朝徽匪伊身議 第二表曰臣聞聖人在上
愚智無以息隱天下有道方圓歸其能是如以駕蹇之
才不致問於千里瓦礫之質佇待價於十城伏願陛下
矜臣負乘之尤照臣匪飾之情迹言觀用允授上才敘
惠流恩曲蠲下第則雲序斯平彛章載穆 沈約拜尚
書令到都上表曰竊位之譏允當斯責王命私請有事
相傾油雲湛露徒降旻昊之德弱縞輕蟬不載邱嶽之

重登階望席恍焉失步 北齊邢子才為文襄皇帝讓

尚書令表曰揚職萬機總任百揆懸衡庶物準納羣僚

何以助日月之光華增天地之高厚反鑑取照匹此何

難倒囊求領方之為易 又表曰正以晝覽太山不假

秋毫之察夜仰列宿豈藉燭龍之明爵人以世既非盛

德之舉公門有私故是陵夷之運 陳江總讓尚書令

表曰臣弱歲立朝本無奇志每謂任登常伯足承基緒

值梁季不造收拙人間東甌三江南徂百越不知秦漢

十有七年心跡退黜平生畢矣但野性踈嬾不屑死增
俯仰垂時人物多忤天飛踐阼任寄隆重謬以商邱之
木遂比舟楫之材燕岱之石混同瑚璉之器當由宗賢
使舉早守名節竊以天府文昌萬方之藪天官冢宰無
所不統禮尊三獨事昭百揆曠職云久三十餘載一旦
開置必資望實豈期廷典私偏濫庸菲薄陛下聽覽餘
辰曲垂昭納遂斯反汗高選具瞻則蔽蓋蔽帷使臣暮
齒歲制月制賒臣皓髮不以一怠

原冊文陳後主授江總尚書令冊文曰夫文昌政本司
會治經韋彪謂之樞機李固方之斗極況其五曹斯綜
百揆是諧同冢宰之司專臺閣之任惟爾道業標峻宇
量宏深勝範清規風流以爲準的儒宗學府衣冠以爲
領袖故能師長六官具瞻允塞明府八座儀刑載遠其
端朝握揆朕所望焉往欽哉懋建爾徽猷亮采我邦國
可不慎與

原啟陳江總除尚書令謝臺啟曰竊以昔之冢司今曰

端揆項同衮無人則闕臣之朽薄安可叨賁謹當奏
承夜月冀奉三思之旨聲寄浮雲方祈九天之路 又
除尚書令斷表後啟曰司會治本冢宰朝端搢紳所屬
儀刑攸在皇代以來無人則闕陛下將備厥職用穆臣
僚不容始自庸菲以謹物議當今藩翰至戚不無其才
廊廟重臣亦有其器伏願檢一作慎俞往之則闡平章之
道臣公心布款有理存焉

御定淵鑑類函卷七十三

欽定四庫全書

御定淵鑑類函卷七十四

設官部十四

尚書僕射 諸曹尚書
尚書左右丞

尚書僕射一

原杜氏通典曰僕射秦官漢因之自侍中尚書博士郎

皆有之古者重武官有主射以督課

古者重武官以善射者掌政事故曰

僕射僕射者僕從於射也

軍屯吏騶宰永巷宮人皆有取其領事之

號凡此諸官皆有僕射隨所領之事以為號也若

成帝

建始元年初置尚書五人以一人為僕射主封門掌授廩假錢穀後漢尚書僕射一人署尚書事令不在則奏下衆事即綬與令同

自漢以下章服並與令同

獻帝建安四年以執

金吾榮劭為左僕射衛臻為右僕射僕射分置左右蓋

自此始

鍾離意拜尚書僕射嘗賜胡侍子緜當三十四尚書郎受詔誤以三百匹上怒召郎欲鞭之意

入曰臣位大罪重郎位小罪輕臣當先坐然後及郎遂解衣當鞭上曰釋之又明帝作北宮意諫止之出為魯

相及德陽殿成百官大會上笑經魏至晉於江左省置曰鍾離尚書在朕不得成此殿

無恒

魏徐宣字寶堅為左僕射加侍中車駕幸許昌宣統留事置二則為左右僕射

或不兩置但曰尚書僕射令闕則左為省主若左右並

闕則置尚書僕射以主左事置祠部尚書以掌右事則

尚書僕射祠部尚書不恒置矣

若無令則左僕射為省主與令同若左右並闕

則直置僕射在其
中間總左右事

宋尚書僕射勝右減左右居二者之

間僕射職為執法置二則為左右執又與尚書分領諸

曹兼掌彈舉

王弘為僕射奏彈謝靈運力人杜興淫其
嬖妾殺興江渙請免官削爵收付大理內

臺舊體不得用風聲舉彈此事彰赫暴
之朝野不敢拱默武帝命免官而已

齊左右僕射行

則分道左僕射領殿中主客二曹

諸曹郊廟園陵車駕
行幸朝儀臺內非違

文武舉補滿叙疾假事其諸吉慶瑞應衆賀災異賊發衆變臨軒策命改號格制涖官銓選凡諸除署功論封爵貶黜八議疑獄通關案則

右僕射領祠部儀曹

掌諸

左僕射主右僕射次經之
藏穀帛文武庫給諸庫資差量人役百工死病亡叛討補考剔非違租布稅調理船車兵器其祠部郊廟喪贈儀曹儀典禮學武官除署移并城邑人戶復除家宅田地興工創架運寫拘慮刑獄聽訟百工免遣通關及案奏事則右僕射主
黃案左僕射上署右僕射次署凡僕

左僕射次經之

射掌朝軌尚書掌獻奏都丞任在彈違

諸詳獄事應須部議相值者皆

即先立意應奏黃案及闕事以立意官為議主凡辭訴有慢命者曹掾咨如舊若命有咨則以主意者為議主

齊梁舊制右僕射遷左僕射左僕射美遷令其僕射處

於中陳亦然後魏二僕射左居上右居下

令僕中丞騎唱而入宮門

至於馬道及郭祚為僕射以為非盡敬之宜乃奏請御在太極騶唱至止車門御在朝堂止司馬門騶唱不入

宮自此始也

又朱仲遠為行臺僕射請準朝式在軍鳴騶廢帝笑而許之其肆情若此

北齊僕射

職為執法置二則為左右僕射皆與令同左糾彈而右

不糾彈隋文帝開皇三年詔左右僕射從二品左掌判

吏部禮部兵部三尚書御史糾不當者兼糾彈之右掌

判都官度支工部三尚書又知用度餘並依舊

楊素為右僕射

與高頊專掌朝政後文帝漸疎忌素詔曰僕射國之宰輔不可躬親細務但三五日一度向省評論大事示崇

重實奪其權也終仁壽之末不復通省事唐左右二僕射因前代本副尚書

令自尚書令廢闕二僕射則為宰相故太宗謂房玄齡

杜如晦曰公為僕射當洞開耳目訪求才賢是為宰相

宏益之道今以漫辭聽訟不暇豈助朕求賢之意乃令

尚書細務悉委於兩丞其冤濫大故當奏聞者則關於

僕射及貞觀末除拜僕射必加同中書門下平章事及

參知機務等名方為宰相不然則否然為僕射者亦無

不加焉至開元以來則罕有加者

自開元以來始有單為僕射不兼宰相者

初龍朔二年改左右僕射為左右匡政咸亨元年復舊

官品第四

上元三年閏五月制尚書省頒下諸州府並宜用黃紙

武后改二僕射

為文昌左右相進階為從三品尋復本階神龍初復為

左右僕射

二年九月敕門下及都省宜日別錄制敕自三月一進

開元元年改為

左右丞相從二品統理衆務舉持綱目總判省事

二年四月

敕在京有訴冤者並於尚書省陳牒所司為理若稽延致有屈滯者委左右丞及御史臺訪察聞奏如未經尚書省不得輒入御史糾不當者兼得彈之至天寶元年

於三司越訴

復舊議曰按僕射秦官其任則微其職甚細東漢以後

雖委任漸重職司會府而非百寮師長之職也又按丞相亦秦官秦氏每羣臣上表皆云丞相臣某為首漢之宗臣蕭何為丞相漢儀丞相進天子御座為起在輿為下有疾法駕至第問得戮二千石申屠嘉欲斬內史鼂錯是也霍光受顧託之重當伊周之地廢昌邑王上表太后丞相敞為首大司馬大將軍臣光次之其尊崇如此中間嘗置左右丞相亦嘗改為相國亦為大司徒大抵漢之丞相是為三公於天下無所不統後漢亦以三

公為宰相則司徒本西漢丞相也後或為丞相或為相
國或為大丞相雖互為之名其實一也曹公司馬師昭
趙王倫王敦王導劉義宣齊高帝梁武帝爾朱榮侯景
陳武帝齊建武隋文帝皆為之歷代多非尋常人臣之
職亦多為贈官然自秦以降實居百寮之長今尚書令
總領衆務舉持綱目僕射貳之誠為崇重且非統國政
宰天下之任宜侍中中書令如直以尊崇則太師不然
上公太尉始可師長命百寮也龍朔中天寶初嘗改侍

中中書令為左右相遠協伊尹仲虺為左右相周公召
公相成王為左右之義斯誠允當或謂尚書令僕射錄
尚書之職是官之師長按前代錄尚書霍光張安世王
鳳趙熹牟融鄧彪張禹李固王導褚彥回齊明帝之徒
或是丞相或是三公或是大將軍大司馬兼之皆秉朝
政猶古冢宰百官總已實宰輔也其時別有令僕令僕
射雖嘗改為丞相名同而職異品秩又未崇極上有三
師三公尚書令七人豈得比前代丞相受任也其襲舊

名無實者若令刺史皆云使持節按前代使持節得戮二千石其王公以下封國皆南面臣人分茅建社其開府儀同三司則禮數班秩皆如三公置府辟吏令並豈有實乎此例甚衆不能徧舉安有僕射因改丞相之名都無丞相之實而為百寮師長也又與丞郎絕禮若不隔品致敬則諸司長官與隔品寮屬其可絕禮乎斯不然矣 增唐制曰唐因隋制以三省之長中書令侍中尚書令共議國政此宰相職也後以僕射為尚書省長

官與侍中中書令號為宰相品位既崇不欲輕授人常以他官居宰相職而假以他名 六典曰左右僕射開元初改為左右丞相掌總領六官紀綱百揆初亦宰相之職也開元初張說兼之後罷知政猶為丞相自此之後遂不知國政天寶元年復為僕射二年改侍中為左相中書令為右相 會要曰左右僕射自武德至長安四年以前並是正宰相初豆盧欽望拜左僕射不言同中書門下三品不敢參議政事數日後始加知軍國重

事景雲二年十月韋安石除左僕射東都留守不帶同
三品自後空除僕射不復為宰相矣開元中張說為右
丞相元宗令選日上因制儀注自非中書門下諸三品
以上皆坐受其禮因為故事元和六年禮官按開元禮
有冊拜官上儀咸與卑官荅拜令僕射皆冊拜官也會
昌二年陳夷行崔珙拜僕射奏僕射始視事受四品官
拜無著令比左右丞吏部侍郎御史中丞皆為僕射拜
階下謂之隔品致敬準禮皇太子見上臺羣官羣官先

拜而後荅無二上也僕射與四品官並列不容獨優開
元二年以僕射為丞相位次三公三公上日荅拜而僕
射受之非是望敕所司約三公上儀注定令 文獻通
考曰宋制左右僕射掌佐天子議大政貳令之職與三
省長官皆為宰相之任元豐官制行不置侍中中書令
以左僕射兼門下侍郎右僕射兼中書侍郎行侍中中
書令職事寄祿為特進政和中詔曰昔神考訓迪厥官
有司不能奉承仰惟前代以僕臣之賤充宰相之任可

改左僕射為太宰右僕射為少宰靖康元年詔依制復為僕射乾道八年詔左右僕射依漢制改為左右丞相石林葉氏曰本朝沿襲唐制官制行始用六典別尚書門下中書為三省各以其省長官為宰相則侍中中書尚書令是也既又以秩高不除故以尚書令之貳左右僕射為宰相而左僕射兼門下侍郎以行侍中之職右僕射兼中書侍郎以行中書令之職而別置侍郎以佐之則三省互相兼矣然左右僕射既為宰相則凡命

令進擬未有不由之出者而左右僕射又為之長則出
令之職自己身行尚何省而覆之乎方其進退執政無
不同則所謂門下侍郎者亦預聞之矣故批旨皆曰三
省同奉聖旨既以奉之而又審之亦無是理門下省事
惟有給事中封駁而已未有左僕射與門下侍郎自駁
已奉之命者則侍中侍郎所謂省審者殆成虛文也元
祐間議者以詔令稽留吏員冗多徒為重複因有并廢
門下省之意後雖不行然事有當奏稟左相必批送中

書右相將上而右相有不同往往或持之不上或退送
不受左相無如之何侍郎無所用力事權多在中書自
中書侍郎遷門下侍郎雖名進其實皆未必樂也 按

以宰相而兼他官本非令典唐制所謂反輕宰相之體
是也然時方用兵則兼節度使崇儒學則為大學士急
財賦則為鹽鐵轉運使蓋以國家方重其事而以宰相
提綱則下不敢以泛泛之司存視之猶有說也至於三
省則俱為政本之地無所不統長官則為宰相所謂中

書門下同平章事是也佐官則參知政事是也今元豐改官制既以中書門下同平章事為左右僕射參知政事為中書門下侍郎尚書左右丞矣而復以左僕射兼門下侍郎右僕射兼中書侍郎則是既自有佐官而復以長官兼之贅疣甚矣蓋神宗必欲復唐三省之職而蔡確以有中書造命之說已為次相兼中書侍郎王珪為首相兼門下侍郎實欲陰擯珪於門下使不得與造命取旨之事苟以便其專政之私而不復顧體統名稱

之不順也 續文獻通考曰遼南面尚書省太祖嘗有
左右尚書其後更設曰尚書令曰左僕射曰右僕射
元無僕射官 明無僕射官

尚書僕射二

原初學記曰僕射秦漢秩六百石公為之增至二千石
至梁加秩中二千石自魏以來品第三至陳加品第二
自東晉以來祠部尚書多不置以右僕射主之 百官
表注曰僕射一人銅印墨綬五時朝服納言幘進賢兩

梁冠佩水蒼玉官品第三月俸四十五石 漢書曰鄭

崇字子游哀帝時擢為尚書僕射數求見諫諍上初納
用之每聞曳草履上笑曰我識鄭尚書履聲後為人所
譖上責崇曰君門如市何欲禁切主上崇曰臣門如市
臣心如水 鍾離意別傳曰意字子阿為尚書僕射其
年匈奴羌胡歸義詔賜縑三十匹尚書侍郎廣陵暨鄴
誤為三千匹詔大怒鞭鄴欲死意排省閣入諫曰海內
遐邇謂陛下貴於財而賤人命愚臣所不安明帝以意

諫合大義志損怒消救大官掾賜酈酒藥詔謂意曰非

鍾離尚書朕幾降威於此郎

此事通典亦載與此小異並存之

魏志

曰桓範薦徐宣為僕射後加侍中光祿大夫車駕幸許
宣總留事帝還主者奏呈文書詔曰吾省與僕射何異
竟不視 又曰陳泰為尚書左僕射典選舉貢事 晉

起居注曰太康元年詔曰山濤自典官人之任志在澄
清風俗朕將倚之以宏訓範庶人倫有日新之美其以
為左僕射 晉諸公贊曰司馬珪時多令望早歷顯職

晉受禪為尚書左僕射年三十七衆論以為美 世說

曰周顗字伯仁為左僕射風德雅重過江積年恒大飲

酒嘗經三日醒時論謂之三日僕射 王隱晉書曰太

康元年詔依舊制置左僕射以山濤清虛恬簡轉為僕

射 齊職儀曰魏朝以尚書僕射毛玠領選曹晉武以

僕射山濤領吏曹後依擬至今或領焉 沈約宋書曰

劉延孫為尚書左僕射延孫疾病不任拜起上使乘船

自青溪至平昌門入尚書下舍 增晉中興書曰紀瞻

字士遠為右僕射肅宗常居內殿慨然憂天下曰社稷之臣欲得十人如何因數之云君便是一人齊書帝欲用張緒為僕射以問王儉儉曰緒少有清望誠美選也南士由來少居此職褚彥回曰儉少年或未憶耳邇江左用陸玩顧和皆南人也儉曰晉昏衰之政不可為則南史徐湛之為尚書僕射令何尚之以湛之國戚任邇隆重欲以朝政推之諸詞訴絕不料省湛之亦以令掌敷奏出納事無不總令跋則僕射總任又以事歸

尚之互相推諉御史中丞袁淑奏並免官詔特無所問
乃使湛之與尚之並受詞訴尚之雖為令而朝事悉歸
湛之 唐德宗貞元元年八月以張延賞為左僕射

唐中宗神龍元年以唐休璟豆盧欽望為左右僕射休
璟仍同三品欽望有軍國重事中書門下可共平章先
是僕射為正宰相其後多兼中書門下之職午前淩政
事午後淩省事至是欽望專為僕射不敢預政事故有
是命

餘詳前一會要

後周書周惠遠為右僕射自關右草創

禮樂鈇然惠遠與禮官損益舊章自是儀軌稍備 宗

太祖建隆元年加魏仁浦右僕射同平章事 神宗元

豐五年以王珪為尚書左僕射兼門下侍郎蔡確為尚

書右僕射兼中書侍郎 高宗建炎四年金以韓企先

為尚書左僕射兼侍中時金方議禮制度企先博通經
史知前代故事或因或草咸取折衷

尚書僕射三

原蒼玉

阜檐

上詳前二拜僕射行將

東觀漢記曰鮑永字君長軍事將兵安撫河東永好

文德雖行將軍常阜襜路稱鮑尚書兵按
通典永常白襜路稱白衣尚書與此異

排閣曳

履並詳前二

清恪

忠允

先賢行狀云毛玠為尚書僕射
雅量公正在官清恪

晉起居

注曰尚書高陽王珪忠
允善政以珪為右僕射

攝百揆

副端右

謝靈運晉書曰古者

重武事貴射御取其捷御如僕各置一人尚書六人謂
之八座參攝百揆出納王命古元凱之任也何法盛

晉中興書曰顧和為尚書僕射以母老固辭詔敕諭特
聽暮出朝還其優遇如是尋朝議以臨端右之副不宜

處於外更加銀
青光祿大夫

協宣庶績

總統留事

晉起居注曰
太康元年詔

云尚書舊置左右僕射所以恢演政典協
宣庶績中間久廢其復置之
下詳前二

國之司直

官之師長

魏志曰毛玠字孝先為尚書僕射時太子
未定臨淄侯植有寵玠諫曰近袁紹以嫡

庶不分覆宗滅國廢立大事非所宜聞會玠起更衣太祖謂曰國之司直我之周昌又曰文帝時欲以賈誼為僕射誼曰尚書僕射官之師長天下所望誼名素不重非所以服人縱誼昧於榮利奈國朝何

五

遷四辭

二龍雙驥

范蔚宗後漢書曰胡廣字伯始五遷尚書僕射王隱晉書曰荀顗代

陳泰為僕射領吏部四辭而後受張銓南燕書曰慕容德以右僕射封嵩為左僕射尚書韓諱為右僕射時嵩諱並年三十又以嵩弟融為西中郎將諱弟軌為東中郎將嵩等俱拜帝臨軒詔令四人同入嵩等升殿方

謝帝顧曰躍二龍於長衢

主開封

括賢俊

漢書儀

僕射主開封口令主贊奏封下書又漢書典官兼職尚書令僕射主開封掌授廩假錢穀也晉起居注云永

昌元年正月詔曰左僕射所以廣括賢俊經始萬化之機僕射護軍荀顗可進為左僕射尚書領選

綜

拔名實

彌縫遺闕

王隱晉書云荀顗字景倩文帝時輔政顗外甥陳泰薨啟顗代泰顗

承泰後加之淑慎綜核名實風俗澄正華嶠漢書云李膺字元禮遠僕射與太傅陳蕃戮力悉心彌縫遺闕

訊牒

隋車

白帖王敬宏為僕射關置文案初不省讀常陪聽訟文帝問以疑獄敬宏不對

帝變色問何故不以訊牒副僕射敬宏對曰臣乃得訊牒政自不解帝不悅後遷尚書令又王常為僕射常

隋車時人謂之隋車僕射

魏尊碩德選在徐宣

晉寵元勳選在

羊祜

俱白帖

增折勲威威

起敵國畏

後漢書鄧壽為尚書僕射時大

將軍實憲威振天下常使門下生齋書詣壽有所請託壽即送詔獄前後上書陳憲驕恣引王莽以誠國家

司馬溫公復起為僕射遭人聞之曰南國復相司馬矣毋輕生事開邊隙

總樞機重權

訪軍國大事

干寶記武帝詔曰散騎常侍羊祜秉德清劬經緯文武雖處心腹之任不總樞機之

重非垂拱無為委任責成之意也以祜為尚書左僕射

宋史至道二年呂端加右僕射上御崇政殿訪以軍

國大事端陳當世急務有條理上嘉納之兆平章之名受都督之任唐

官志貞觀八年僕射李靖以疾辭位詔疾小瘳兩三日一至中書門下平章事平章之名始此宋紹興七年

以右僕射張俊為江淮都督出視師以艱難協主心以博大開上意

言行錄李沆為尚書右僕射日取四方水旱盜賊奏之王旦以為細事不足煩帝聽沆曰人主少年當使知四

方艱難不然血氣方剛不留意聲色犬馬則土木甲兵禱祀之事作矣識者服其遠見元祐三年范純仁為

右僕射務以博大開上意忠厚草士風撤簾還政肩輿入省英宗治平元年

韓琦欲太后撤簾還政乃取十餘事稟帝帝裁決悉當琦即詣太后覆奏太后每事稱善琦即白太后求去太后曰相公不可去我當還深宮耳遂起琦即厲聲命撤簾簾既落猶於御屏後見后衣也哲宗元祐元年以

司馬光為尚書左僕射既而詔都民遮留中外鼓免朝覲許乘肩輿三日一入省

舞僕射司馬光過闕廷衛士見公入皆以手加額都民遮道呼留言行錄陳康伯時淮甸被兵上親札遣

中使即家居召公復拜尚書左僕射制出中外鼓舞成功雲雷際翊聖天地

安岑參題左僕射相國冀公陳齋

尚書僕射四

原署尚書事

續漢書百官志曰尚書僕射秩六百石承秦所置署尚書事

省錄臺

事

謝承後漢書云尹昆時拜尚書僕射詔曰惟君功曹時以太守之術克獎王室其省錄臺事勿令謬誤

綜詳朝政

晉起居注云太始七年詔曰尚書僕射總括萬機以貳紀綱綜詳朝政

內

贊治道

臧榮緒晉書曰謝安石為僕射詔曰尚書安石沖允清純識體宏亮宜內贊治道外綏戎政可

尚書僕射吏

部後加將軍

稱為廉平

虞預晉書云虞欽字子若少好學為尚書僕射加侍中奉

車都尉領吏部清實

稱為強正

晉起居注云刁協字元亮為尚書左僕射

選舉稱為廉平也

於時中興草創制度未立朝臣無習朝儀者惟協以久在中朝多諳故事朝廷憲體出入威儀唱贊皆一稟於

協當時稱為

公清為性

臧榮緒晉書云朱整字偉齊為尚書僕射領吏部公清為性持

為強正

真勵守

平正為能

東觀漢記云桓虞字伯春遵尚書僕射據法斷事周密平正以為能擢為

南陽太守 舉臺憚之

司馬彪續漢書云鍾離意字子阿為堂邑令有能徵拜尚書僕射事有不

便輒封還上 諫舉臺憚之

四海翕然

先賢行狀云毛玠為尚書僕射其典選舉拔真實斥華偽

進遜行抑阿黨諸宰官治民績不著而私財足者皆免廢久不選用於時四海翕然莫不厲行

黃瓊

藉田奏上從之

華嶠漢書云黃瓊字世英為僕射順帝久廢藉田瓊曰上古聖帝莫不敬恭神

明恭郊廟之禮親藉田之勤書奏上從之

王珣文章為上所昵

晉中興書云王珣字

元琳拜侍中尚書左僕射領吏部時烈宗雅好典籍珣與郗恢殷仲堪徐邈等並以才學文章為上所昵

何澄坐家視事

晉起居注云何澄字季元遷左僕射領選脚疾辭詔聽不朝坐家視事又領本

州

李豐常多託疾

魏略云李豐字安同為侍中僕射在臺閣多託疾時臺制疾滿百日

當解祿豐未滿百日暫起已復卧如是數歲及太傅父
病曹爽攝政豐依違三公間無所是非故時人有謗書
曰曹爽之勢熱如湯太傅父子冷如漿李豐兄弟如游
光其意以為豐雖外示清淨而內圖事有似游光也

增黑面僕射

後魏書陽平王新成之子欽字思若累
遷尚書右僕射欽色黑時人號為黑面

僕射僕射均田

北齊書高隆之為尚書僕射初給民田
貴勢皆占良美貧弱咸瘠薄隆之啟高

祖番更反易
乃得均平

大小僕射

陳書袁憲遷右僕射參掌選
事先是憲長兄簡懿為左僕

射一時臺省目簡懿為
大僕射憲為小僕射

解事僕射

唐書戴至德為僕
射時與劉仁軌更

日受詞訟嘗有老母詣省陳詞至德已收牒省視老母
前曰本謂是解事僕射所以來訴公乃是不解事僕射
請付還牒來至德笑而
還之時人稱其長者

奏格內降

言行錄趙鼎遷左
僕射以政事之先

後及人才之所當召用者密條置左右一
一奏稟行之凡內降恩澤多奏格不行

大耐官職

又向敏中除右僕射上使李昌武觀之方謝客門無一
人昌武入見賀曰今日降麻士大夫莫不歡慰公但唯
唯又曰自上即位以來未嘗除端揆自非眷倚殊絕何
以至此公復唯唯又歷敘前世為僕射者勲業之盛禮
命之重公亦唯唯使人至廚中問有飲宴者亦寂無
一人明日以實具對上笑曰向敏中固大耐官職

賜張商霖字

徽宗大觀四年商英為尚書右僕射時久
旱彗星中天商英受命是夕彗星不見明

日雨帝喜因大書
商霖二字賜之

尚書僕射五

原詩梁任彥昇出郡傳舍哭范僕射詩曰平生禮數絕

式瞻在國楨一朝萬化盡猶我故人情待時屬興運王
佐俟人英結歡三十載生死一交情攜手適衰孽接景
事休明運阻衡言草時泰玉階平濬冲得茂彥夫子值
狂生伊人有涇渭非余揚濁清將乖不忍別欲以遣離
情不忍一辰意千齡萬恨生已矣平生事詠歌盈篋
筭兼復相嘲謔常與虛舟值何時見范侯還叙平生意
與子別幾辰經塗不盈旬弗覩朱顏改徒想平生人
寧知安歌日非君撤瑟辰已矣余何歎輟春哀國鈞

唐任希古和左僕射燕公春日端居述懷詩曰豐野光
三傑媯庭贊五臣綈絀歌美譽綵竹詠芳塵聖厯開環
象昌年降甫申高門非捨築華構豈垂綸鳳郎搏霄翰
龍池躍海鱗玉鼎升黃閣金章謁紫宸禮闈通政本文
昌總國鈞調風振薄俗清教正彛倫星迴應綬管日御
警寅賓葉上曾槐變花發小堂春思挂東都冕言訪北
山巾赫赫容臺上千祀耀平津 趙彥昭奉和悼右僕
射楊再思詩曰兩揆光天秩三朝奉帝熙何言集大鳥

忽此喪元龜坐歎公槐落行聞宰樹悲壑舟今已去寧
有濟川時 增韓翃上田僕射詩曰家封薛縣異諸田
報主榮親義兩全僕射臨戎謝安石大夫持憲杜延年
金裝畫出羅千騎玉案晨餐直萬錢應念一生留闕下
閨門遙寄魯西偏 黃滔賀清源僕射新命詩曰雖言
崧嶽秀崔嵬少降連枝命世才南史兩榮惟百揆東閩
雙拜有三台二天在頂家家詠丹鳳銜書歲歲來虛說
古賢龍虎盛誰攀荆樹上金臺

增詔梁授蕭重休左僕射詔曰門下尚書萬事之本隆
替是寄總司頓闕宜速有人具官蕭重休才學淹通識
裁詳允內著嘉庸外敷美政入副朝端僉議斯在可守
尚書左僕射餘如故

增制唐蘇頲授劉幽求左僕射制曰門下尚書佐理四
方取則端揆成務百工是師非允具瞻孰康庶績封州
流人劉幽求風雲玄感川岳粹靈學綜九流文窮三變
義以臨事精能貫日忠以成謀用若投水茂勲立艱難

之際嘉謨盈啟沃之初存謹直以不回為姦邪之所忌
縈萌頗露譖端潛發元宰見逐讒人孔多既誅羣兇方
宣大化期間政於經始載登賢於夢卜 常袞授李忠

臣右僕射制曰文昌所以法成象端右所以長庶寮秦
漢則內掌武事魏晉或外綏戎政今之垣翰重任勤勞
有功歷踐六卿始終一德必訪羣議然後當盛選 授
令狐彰右僕射制曰中臺萬事之會端右庶寮之式所
以總詳參貳恢演協宣勲德兼崇則殊在師長之重勤

勞於外則不親損益之煩凡命此官必書於冊極茲朝
選用屬時賢元稹授韓臯左僕射制曰夫一邑之政
而猶資老者之智用壯者之決況朝廷之大得不以耆
年重望居表正之地儀刑於百辟乎具官韓臯始以直
言事代宗皇帝司諫諍復以文章政術事德宗皇帝為
舍人中丞京兆尹在順宗憲宗時出領藩方入備卿長
逮予小子厯事五君勤亦至矣而又處權近之際未嘗
以恩幸自寵於一時當趨嚮之間終不以薄厚見窺於

衆目豈所謂徐公之行已有常而詩人之風雨不改耶
罷去職勞正名端右凡百庶寮無忘咨稟 宋除呂蒙

正尚書僕射制曰邦國政治蓋出於中樞朝廷紀綱盡
歸於會府矧乃端揆之任聿居師長之崇苟非台鉉之
賢曷慰搢紳之望具官呂蒙正挺生英氣符合昌期自
先夢卜之求遂荷鹽梅之寄謨明匪懈亮直不渝爰自
天官再持政柄洎和鼎實時維老成朕欽若丕圖建用
皇極雖彌綸大體固未協於康哉而勵翼小心亦備觀

於勤止頗鬱隆年之望宜均勞逸之功長是中臺式茲
百辟

原銘梁沈約尚書右僕射范雲墓誌銘曰合契興王匪
勞物色乘風鬱起化成龍翼乃作喉脣帝猷必舉乃作
銓衡彛倫有序北京岨峻東川迴薄蘊吾名臣終天靡
作

原表宋傅亮讓尚書僕射表曰自皇基肇創豫班策勛
纖善微績未聞朝野百揆治樞總貳殷要誠非庸臣所

宜叨擬臣聞權衡既懸錙銖靡遁厲驚習驥終莫之近

敗駕傷錦備之前誥必將上增國垢下招私黷齊王

儉讓左僕射表曰待臣於常均之外眄臣於代僚之右

親乖其章乘非其器霸府方隆超居元任國朝草昧參

贊百揆梁沈約讓僕射表曰臣聞役壯休老上典所

優農行暮息事身恒分若夫玄黃未已非秋駕之衛筋

力為用豈強飯之時養老杖鄉仰推前典服戎告謝親

學匪任宿肉極其虛億歲制防其不辜實所以竭假衰

疾收屏淪暮

張纘讓尚書僕射表曰加以矯心飾貌

酷非所閑不喜俗人與之共事雖復吐言如傷屈體無
骨動容竊斧猶成多憾曾聞如闕坐客恒滿情態參差
世塗盈虛蕙以興謗拾塵見猜疑似雖分聖賢致惑人
之包藏山川非險況在於臣焉可證綜

陳徐陵讓左

僕射初表曰臣聞七十之歲揚雄擬經六十之年平津
對策若斯強壯無歎耆老臣勵則冑華軒冕才允卿相
出納流譽朝野具瞻臣宏正國老儒宗情尚虛簡元風

勝業獨王當年臣種器懷沈密文史優裕東南貴秀朝廷親賢並見壯猷皆宜左執若漢武好少而徵臣已老若周文愛老則有此羣才伏願天明更謀梓匠求其妙選稱是能官 又讓右僕射初表曰加以言尋盟好仍屬亂離先零盜其牛馬烏孫竊其印綬子卿茹雪叔向為凶雖復東歸備罹此厄昔李廣遺恨不值漢初甯戚自悲不逢堯禪臣隨望聖運實在權輿時參決勝之籌頗秦發兵之讖當塗錫舍非無董昭之誠典午禪文不

降張華之寶 江總讓尚書僕射表曰藻鏡官方品裁
人物門驚如市不慙屋漏心抱如水無欺暗室但屢淹
星鳥每知忝素世網拘束事歸僊勉今此召會尤增據
蒞竊以端揆副職官稱師長草履升降傳呼寵赫儀刑
朝首冠冕彛倫兼復參總衡流匡佐聖治妄庸重責必
踐危機

諸曹尚書一

原杜氏通典曰秦尚書四人

不分漢成帝初置尚書五
曹名

人其一人為僕射四人分為四曹

尚書曹名自此而有常侍曹主

卿

二千石曹

主郡國二千石

民曹

主凡吏民上書以人字改焉自後歷代曹部皆同

客

曹

主外國裔翟

後又置三公曹

主斷獄

是為五曹後漢尚書五

曹六人其三公曹尚書二人

掌天下歲盡集課州郡

吏曹

掌選舉齋祠後

漢志謂之常侍曹亦謂之選曹

二千石曹

掌中都官水火盜賊訟罪法亦謂之賊曹

民曹

掌繕理功作

客曹

掌羌胡朝賀法駕出則護駕後漢光武分二千石曹及客曹為南主客北

鹽池苑園

主客兩梁冠納言幘或說有六曹

按後漢志云分客曹為二是六曹也又晉

志云以前漢五曹更加中都官曹為六曹也應劭漢官儀云二千石曹主中都官事則不應更有中都官曹也

今依劬說為五曹六人又張陵字處仲為尚書歲魏
朝梁冀帶劍入省陵叱令奪劍勸冀詔以歲俸贖罪魏

有吏部左民客曹五兵度支凡五尚書晉初有吏部三

公客曹駕部屯田度支六曹

無五兵

太康有吏部殿中五

兵田曹度支左民為六曹尚書

無駕部三公客曹

及渡江有吏

部祠部五兵左民度支五尚書

皆銅印墨綬乘輅車卑輪執笏負荷加侍中者

武冠左貂金蟬宋有吏部祠部度支左民

左民及駕部二曹都官

五兵六尚書齊梁與宋同

侯景改梁五兵為七兵尚書又職官錄曰齊尚書品服悉

與令亦別有起部而不常置也

梁何允字子季為左民尚書後辭官隱於若耶

山雲門寺敕給白衣尚書祿允固辭又到洽為御史中丞兄既為左民尚書舊中丞不得入尚書下舍洽引

服親不應有礙御史省詳決乃許入既省亦以兄弟素篤不能相別陳與梁同後魏初有

殿中掌殿內兵馬倉庫樂部掌伎樂及角使五伯駕部掌牛馬驢騾南部掌南邊州

郡北掌北邊州郡五尚書其後亦有吏部初曰選部兵部都官

度支七兵祠部民曹等尚書又有金部庫部虞曹儀曹

右民宰官元提為宰官尚書都牧元禎為都牧尚書牧曹右曹太倉太

官祈曹神都儀同曹等尚書自金部以下但有尚書之名而不詳職事北齊

有吏部殿中殿中統殿中曹主駕行百官留守名帳宮殿禁衛及儀曹三公駕部四曹祠部

五兵都官度支六尚書後周無尚書隋有吏禮兵刑戶

工六部尚書唐尚書與隋同

龍朔二年改尚書為太常伯咸亨初復舊

歷代

吏部尚書及侍郎品秩悉高於諸曹

初學記曰案叙

諸曹尚書秦官也漢因之光武分為六曹并一令一僕

射謂之八座魏有五曹與二僕射一令謂之八座

魏有吏部

左民客曹五兵度支凡五曹尚書

晉有六曹宋有六曹

宋加東都官尚書

齊梁

陳六曹

齊曹名同宋此

後魏北齊六曹

後魏北齊有吏部殿中祠部七兵都官度支

中

後周依周禮置六官尚書之任隋氏六曹

隋有吏部禮部兵部都官

度支工部開皇三年改度支為戶部都官為刑部是也

唐六曹

初置民部餘同隋氏貞觀末改民部

為度支尋復改為戶部龍朔二年改尚書為大常伯改吏部禮部戶部兵部刑部工部為司列司禮司元司戎

司刑司平則天后亦依周禮六官也

初宋齊梁陳四代復有起部尚書營

宗廟則權置畢則省

已上並漢官齊職儀及五代史百官志

諸曹尚書二

原再昇

周歷

謝承後漢書曰魏朗字伯英入為尚書再升紫微臺諤禁省不屈豪右為百寮

所服以黨事免朗性矜嚴閉門整法長吏希見動有禮序室家相待如賓子孫如事嚴君焉又曰蔡邕字伯

喈以待書御史遷尚書三月之間周歷三臺遷侍中

委珠

賜劔

謝承後漢書曰鍾離意字

子何明帝徵為尚書交趾太守坐贓伏法以資物簿入
大司農詔班賜羣臣意得珠璣悉以委地而不拜帝怪
問其故對曰臣聞孔子忍渴於盜泉之水曾參迴車於
勝母之鄉惡其名也贓穢之寶不敢拜帝笑曰清乎尚
書賜錢三十萬東觀漢記曰章帝賜尚書劔各一手
署姓名韓稜楚龍泉邳燾蜀漢文陳寵濟南鍛成一室
兩刃其餘皆平劔其時論者以為稜淵深有謀故得龍
泉燾明達有文章故得文劔寵敦樸有善於內不見於
外故得鍛成劔
皆因名而表意
白衣 文劔 後漢書曰鄭均字仲虞
為尚書澹泊無欲以病
乞骸骨終不肯起章帝車駕幸均舍敕賜尚書
祿終其身時人號曰白衣尚書 下詳賜劔注 歷三

臺

任七年

上詳周歷注 晉書杜預為度支尚書在
內七年損益萬事酬酢諮諏不可勝紀

賜鍛成

封廣武

華嶠後漢書曰陳寵字昭公以德
行明敏入為尚書寵性周密常稱

人臣之義苦不畏慎自在樞密謝門人不復教拒知友
時賜寵劔得鍛成劔以其敦樸晉書曰張華為度支
尚書決勝緣江地近萬里始羊祜謂親曰終
吾事者惟當華耳卒如祜言封廣武縣侯
酬酢諮

諏嘉謀良圖

上詳任七年注晉書云山濤轉尚書
表辭才下年老詔曰方今多事嘉謀良

圖委以老成也

朱穆正直

黃琬方毅

謝承後漢書曰朱穆
為尚書諫言正直

續漢書曰黃琬方毅
廉貞為侍中尚書

諸曹尚書三

原三為選官

裴松之晉紀云江彪
三為選官少有薦舉

損益萬機

晉書杜預為度

支尚書損益萬機不可勝數朝野稱
美號曰杜武庫言其無所不有也

閑練舊典

益部耆舊

欽定四庫全書

卷七十四

傳太尉李固薦楊準累世服事臺閣閑練

典定舊制

袁山松漢書云伏湛建武二年拜尚書典定舊制

事無不綜

傅子云傅嘏為尚書事無大小

無不綜也

內外不漏

謝承後漢書云王博字季習拜尚書明敏習漢家舊事在臺歷載夙夜敬

戒內外不漏

敏於衆職

謝承後漢書云荀緄字伯條拜尚書性明亮敏於衆職以晁羣寮秉

機平直公卿大夫莫不憚之

幹機密職

又云楊高字聖建拜尚書淵懿博雅治術亦辨優納

王事明習國家典故幹機密之職夙夜周慎退食自公儀表偉麗每朝賀百寮側目

臺閣彈駁

魏略云丁謐遷尚書謐為人外似疎略而內多忌其在臺閣數有所彈駁臺中患之事不得行

軍糧

校計

朱鳳晉書云帝以司馬孚為度支尚書軍糧校計一皆由之

文武羣才多所

明拔

先賢行狀曰崔瑗拜尚書委授銓衡總齊清議十有餘年文武羣才多所明拔朝廷歸高天下稱平

也

內外衆職各得其才

傅咸陳事云正始中何晏典選舉內外衆職各得其才傑

然之羨於斯可觀

拔真斥偽

先賢行狀云毛玠為尚書典選舉拔真實斥華偽長吏選者乃

枯面羸衣乘柴車者也

澹泊無欲

詳初學記

許混鑒識

魏志云許混幼子也

清虛有鑒識明帝時為尚書

王昶考課

詳類聚尚書總裁

翟酺高第

後漢

酺字子庶遷侍中時尚書有缺詔將大夫六百石以上試對政事天文道術以高第者補之酺自恃能高而

忌故太史令孫懿恐其先用乃往候懿既坐言無所及惟涕泣流連懿怪而問之酺曰圖書有漢賊孫登將以

才智為中官所害觀君表相似當應之酺受恩接悽愴君之禍耳懿憂懼移病不試由是酺對第一拜尚書

案春秋保乾圖曰漢賊臣名孫登大形小口長七尺九寸巧用法多技方詩書不用賢人杜口也

鍾

離大德

鍾離意別傳云索邑令鍾離意至德仁和明帝詔徵詣闕拜尚書

光耀紫微

韋誕集云入作納言光耀紫微

光翼明聖

陸機云惟是喉舌光翼明聖

諸曹尚書四

原詩宋顏延年直東宮荅鄭尚書詩曰皇居體環極設險祗天工雨閤阻通軌對禁限秋風跂予旅東館徒歌屬南墉寢興鬱無已起觀辰漢中流雲靄青闕皓月鑒丹宮踟躕清防密徙倚恒漏窮君子吐芳訊感物惻余

衷惜無邱園秀景行彼高嵩 隋劉斌和許給事傷牛

尚書詩曰名臣不世出百工之所求況乃非常器遭逢
興運秋符采照千里銓衡綜九流經綸資博物尊俎寄
皇猷韶濩傾復理典禮紊還修雖貞棟梁任兼好藝文
游佇聞和鼎實行當奉介邱高衢翻稅駕閱水遽遷舟
傳呼更何日曳履聞無由歸魂藐修路征擢艤邪溝林
薄長風慘江山寒雲愁夜臺終不睹遺芳徒自留

原箴後漢繁欽尚書箴曰龍作納言帝命惟允山甫翼

周實司喉吻赫赫禁臺萬邦所庭無曰我平而慢爾衡
無曰我審而怠爾明四岳阿鯀績用不成虞登八凱五
教聿清舉涉其私乃忝服榮正直是與伊道之經先民
匪懈永世流聲君子下問敢告侍廷

尚書左右丞一

原杜氏通典曰尚書左右丞秦置尚書丞一人屬少府
漢因之至成帝建始四年置丞四人及後漢光武始減
其二則置左右丞佐領僕射之事左丞臺中紀綱無所

不總主吏民章服及騶伯史右丞與僕射皆掌授廩假

錢穀又假署郎綬及紙筆墨諸財用庫藏

楊喬為右丞行直太常辛

柔柔不避車喬奏
柔不敬下廷尉

左右丞闕以次久郎補之三歲為刺

史漢御史中丞侍御史行複道中遇尚書及丞郎避車

執版揖丞郎坐車舉手禮之車過遠乃去尚書言左右

丞敢告知如詔書律令郎見左右丞對揖無敬稱曰左

右君丞郎見尚書執版揖稱曰明時郎見令僕執版拜

朝賀對揖魏晉左右丞銅印青墨綬進賢一梁冠介幘

絳朝服左丞主臺內禁令宗廟祠祀朝儀禮制選用署吏急假兼糾彈之事右丞掌臺內庫藏廬舍凡諸器用之物及刑獄兵器器督錄遠道文書章表奏事宗因之而

右丞亦主錢穀

虞玩之字茂瑤宗元徽中為右丞齊高帝參政與玩之書曰今曹藏有闕吾賢

居右丞已覺金粟可積矣

皆銅印黃綬齊左右丞寢廟郊祠吉慶瑞

應災異立作格制諸案彈用除置吏補滿除遣

任遐為右丞奏

御史中丞陸澄不糾事請免澄官又建康令與秣陵令同乘行車前導四卒右丞沈昭略奏凡有鹵簿官共乘不得兼列驛視中書郎遷黃門郎左丞掌兵士百工補導請免其官

役死叛考代年老疾病解遣其內外諸庫藏穀帛刑刻
創架爭訟田地船乘兵工死叛考別討補差分百役兵
器諸營署人領州郡租布民戶移徙州郡縣并帖城邑
人戶割屬刺史二千石令長丞尉被收及免贈文武諸
犯削官事白案則右丞上署左丞次署黃案則左丞上
署右丞次署諸立格制及詳讞大事郊廟朝廷儀體亦
左丞上署右丞次署梁皆銅印黃綬一梁冠左丞掌臺
內分職儀禁令報人章督錄近道文書章表奏事糾諸

不法凡諸尚書文詣中書省者密事皆以契刀囊盛之

封以冰相印

劉治字義璿為左丞準繩不避貴戚尚書省賄賂莫敢通

右丞掌臺內

藏及廬舍凡諸器用之物錄遠道文書章表之事陳因

之後魏北齊左丞為上階右丞為下階北齊左丞掌吏

部等十七曹

吏部考功主爵殿中儀曹三公祠部主客左右中兵左右外兵都官二千石度支左

右并糾彈見事又主管轄臺中道失并糾駁之

崔昂除左丞兼

度支尚書左丞兼尚書近代未有惟昂為冠首朝野榮

之又酷吏宋游道為左丞始為故事於尚書省門立

石以警出入早晚令僕以下皆為側目

右丞掌駕部等十一曹

駕部虞曹屯田起部

兵部比部水部膳部倉部金部庫部

亦管轄臺中惟不彈糾餘悉與左同

隋左右丞掌分尚書諸司糾駁

元壽字長壽為尚書左丞蕭摩訶妻患將死奏

令其子向江南收家產壽奏劾之曰摩訶遠念貲財近忘匹好令其子舍危懼之母為聚歛之行御史韓微之

等見而不彈請付大理臣忝居左轄無容寢默

唐因隋制龍朔二年改為左右

肅機

其年有字文化及子孫論資蔭所司理之至於勾留右肅機陽昉未詳案狀訴者自以道理已成無

復疑滯勒而逼昉昉謂曰適退朝未食食畢詳之訴者曰公云未食亦知天下有累年羈旅者乎昉遽命案立

判之曰父弑隋主子訴隋資生者猶配遠方死者無宜更叙

咸通元年復舊

儀鳳四年韋仁

約除尚書左丞約奏曰陛下為官擇人無其人則闕令不惜美錦令臣製之此陛下知之深矣微臣盡命之日

矣振舉綱目略無
留事羣曹肅然

左丞掌管轄諸司糾正省內勾吏部

戶部禮部等十二司通判都省事右丞掌管兵部刑部

工部等十二司餘與左丞同 初學記曰案叙尚書丞

秦官也漢因之光武置左右二丞丞承也言承助令僕

總理臺事尚書令與左丞總領紀綱僕射與右丞掌稟

假財穀魏晉以來左丞得彈奏八座故傳咸云斯乃皇

朝之司直天臺之管轄是也自漢魏以來品皆第六秩

四百石梁加品第四秩六百石

出齊職儀及五代史百官志

增六

典曰左右丞掌管轄省事糾舉憲章以辨六官之儀制而正其文法分而視焉 晉書百官表志注曰左右丞俸月三十斛 五代史後唐書曰梁開平二年改左右丞為左右司侍郎避廟諱也至同光年十月復舊為左右丞長興元年九月詔曰臺轄之司官資並設左右貂素來相類左右丞不至相懸以此比方豈容各別自此宜升尚書右丞官品著與左丞並為四品 續通鑑綱目曰神宗元豐五年官制成改參知政事為門下中書

侍郎尚書左右丞 文獻通考曰宋制左右丞掌參機

大政通治省事以貳令僕射之職僕射輪日當筆遇假

故則以丞權當筆知印大祭祀酌獻薦饌進熟則受爵

酒以授僕射舊班六曹尚書下官制行升其秩為執政

官元豐五年五月詔左右僕射丞合治省事是月御史

言左右丞蒲宗孟王安禮於都堂下馬違法犯分安禮

爭論帝前以為今左右丞為執政官不應又有厚薄左

右丞於都堂上下馬自此始元祐元年詔本省應受御

札事大者送中書省取旨事小急速止本省行訖奏知
仍關報中書門下其未便者聽執奏又六曹擬鈔左右
丞簽書僕射書檢又事有條例不至大者六曹長官專
決非六曹所能決者申省常程及訟牒止付左右丞

初藝

祖既因唐制置宰相復用翰林學士陶穀之言命薛居
正沈義倫為參知政事以為宰相趙普之貳官制行罷
參知政事以門下中書侍郎尚書左右丞為執政時章
惇以前參知政事除門下侍郎張璪以參知政事除中
書侍郎蒲宗孟王安禮自翰林學士除尚書左右丞云
元豐寄祿為光祿大夫建

炎三年詔中書門下二侍郎並復改為參知政事廢尚

書左右丞 續文獻通考曰金左丞右丞各一員正二品為執政官為宰相之貳俱列於尚書省下 元左右丞各一員按元中書令為極尊次則左右丞相平章政事左右丞參政參議中書省事左右司郎中皆參贊中書者 明初改中書省左右相國為左右丞相左右丞各一人皆係中書省後革中書省並左右丞不設

尚書左右丞二

原紀綱

管轄

上詳通典 傳咸答辛曠詩序曰尚書左右彈八座以下居萬機之會斯乃皇

朝之司直天臺之管轄余前為左丞具此
職之要後忝此任餽餽從事日慎一日

司直 準

繩上詳管轄注 傅暢晉諸公贊曰許奇
字子泰為尚書左丞有準繩有節操

解交 增

秩漢官儀云漢制八座丞郎初拜並集都座交禮還又
解交 續漢書云黃香字文彊拜尚書左丞功滿當

遷和帝詔留增秩
後拜尚書遷僕射

百寮憚 三臺清

王隱晉書曰郗
宏始為尚書郎

遷左丞為百寮所憚後坐事洩免 又曰劉恢字
長升為尚書左丞正色在朝三臺清肅出無中丞

彈

八座 肅三臺

並詳

奏郭奕

彈崔洪

王隱晉書曰
傅咸為尚書

左丞時尚書郭奕咸故將也累辭疾病不起復不上朝
又自表妹蔡乞出臨喪詔書聽許咸舉奏之下見挽

弩自
射注

掌威儀

主財用

續漢書百官志曰左丞掌錄
尚書吏人上章百官威儀

下詳
前叙

總領綱紀

掌稟錢穀

並詳初學記

增北斗中樞

南宮左轄

見後樊左丞讓官表

職稱朕望

功滿詔留

唐戴胄拜

尚書右丞尋遷左丞太宗謂胄曰尚書省天下綱維百司所稟若一事有失天下必有受其弊者今以令僕係之於知當稱朕所望也胄性聰明處斷明速議者以爲左右丞稱職武德以來一人而已下見增秩注

豪貴拂席

有司供帳

唐王維以詩名盛於開元天寶間諸王駙馬豪貴之家無不拂

席迎之乾元中爲尚書右丞張說代源乾曜爲左丞視事之日上敕所司供帳設音樂內出酒食御製詩一

篇以叙其事

記令史名

對三駟飲

梁書劉覽除尚書左丞令史七百一人一見

並記姓名當官清正無所私南史尚書二丞給三駟謝幾卿性不拘朝會嘗預晏樂遊苑不得醉而歸因詣

道邊酒壚停車寨帷與車前三騶
對飲觀者如堵幾御處之自若

上殿不下至門

不開

凡梁書賀琛遷尚書左丞并參禮儀事琛前後居職

省中為之語曰上殿不下有賀雅琛容止都雅故時人

以此呼之北齊張耀為尚書左丞文宣近出令耀居

守文宣夜還耀不開門勒兵嚴備火至看面然後開迎

文宣笑曰君欲學郅君章也賜以錦袍以其忠勤遂見

親不置僕射怒對宰相

唐書貞觀中宇文節為尚書右丞明習法令以幹局

見稱江夏王道宗嘗以私事託於節節遂奏之太宗大

悅賜帛二百匹勞之曰朕不置左右僕射者正以卿在

省耳顏真卿為尚書左丞代宗車駕自陝府還真卿

請先謁五陵孔廟而後還宮宰相元載謂真卿曰公所

見雖美其如不合時宜何真卿怒而前曰用舍在相公

言者何罪然朝廷事豈堪相公再破除也載深銜之

奏求良田

劾競銀窟

隋書楊汪為兵部侍郎數年文帝謂諫議大夫王達曰卿

為我覓一好左丞達遂私於汪曰我當薦君為左丞若
事果當與良田為報汪以達言奏之達竟獲罪尋拜汪
尚書汪明習法令果於割斷時號稱職北史隋郎茂
為尚書左丞時工部尚書宇文愷右翊衛大將軍于仲
文競河東銀窟茂奏劾愷位望已隆祿賜優厚拔葵去
織寂爾無聞求利下文曾無媿色仲文大將軍近臣趨
侍階庭朝夕聞道虞芮之風抑而不慕分銖之利知而
必爭何以貽範庶寮示民軌物愷與仲文竟坐得罪

美錦令製

挽弩自射

書上見通典注晉郤詵為尚書左丞糾吏部尚書崔洪洪

曰我舉郤丞而還奏我此為挽弩自射詵聞曰昔趙宣
子任韓厥為司馬厥以軍法戮宣子之僕宣子謂諸大
夫可賀我矣崔侯為國舉才我以才見舉
惟才是視各明至公何故斯言洪聞悅服

歷固按火

當食批案

唐書趙涓為監察御史時禁中失火火發處與東宮相近代宗疑之涓為巡使俾令

即訊涓因歷孺園按據迹狀乃上言中官遣火所致也既奏代宗稱賞德宗時在東宮常感涓究理詳明及刺衡州年考既深與觀察使韓滉不相得滉奏免涓官德宗見名謂宰相曰豈非永泰初御史趙涓乎對曰然即日拜尚書左丞下見通典注

尚書左右丞三

原掌百官威儀

詳初學記

主臺內體制

晉百官表注曰左丞主臺內體制選

用署吏督遠近文書急假也

職輕事重以賤制貴

傅咸表云左丞職輕事重以賤

制貴人所難居臣以閭劣猥忝斯任媿於不稱懼罪之及也

領都令史

晉百官表注云左丞

領都令史七人史五人
幹二藩人八也

署諸財用

詳通典

量物多少百

官表云右丞主內庫藏斛量物用多少及
稟假民戶布租刑獄兵器督錄遠道文書

久次即補

漢官侍臣主法左
右丞久次即補也

攸攝百揆

王導答別駕孔坦拜左
右丞辭表云省啟慨然

卿在朝無賴端右康濟時務拾遺損益者多矣衆談咸
以左丞事要宜須諒直以攝百揆令天下事繁亦是急

病讓夷之日
豈得已也

無彈外官

江彪駁議云左丞荀勗以見
事彈免建康令杜孝怡等至

於左右丞都無彈外官之事
則我朝之明準遵而勿失也

言辭辨達

謝承後漢書
云張稷字衛

君除尚書侍郎左丞朝賀陸見進對威
儀辭令辨達明帝深奇異之拜膠東相

閑練故事

又楊

高字至達尚書侍郎轉左丞自在臺閣閑
練漢家故事前後上表陳國政便宜事

傅咸奏王

懋

王隱晉書云傅咸字長虞為丞殿中嘗火百寮莫不赴救而尚書東平王懋等不赴臺咸以懋等職在機

近宜當風發先百寮就在患疾宜自扶力而晏然在外不赴警急奏免懋咸前後所彈奏辭皆深切及八座以

下峻急莫不側目者

白袞奏山濤

又武帝以山濤為司徒頻讓不許濤出徑歸家左丞白袞

奏濤違旨詔杖袞五十

違命加罰

楊濟與傅咸書云昨違命相視受罰云太重以為相怛然

荅曰違拒上命稽停招罰退思此非在於不測則加罰然退用自戰悸何敢復以杖重為劇乎

懦弱

免官

晉中興書云王國寶因酒坐怒右丞祖台之詔曰國寶縱肆情性其不可長台之懦弱非監司體其

各免官

尚書左右丞四

原詩梁沈約和左丞庾杲之移病詩曰歲暮豈云聊參
差憂與疾匪斡孰能賜持身固無述握蘭空盈把待漏
終不溢嚙喧滿眼前簿領紛盈膝安用談天辨徒勞夢
賜筆掛冠若東都山林寧復出 增唐杜甫贈韋左丞
丈濟詩曰左轄頻虛位今年得舊儒相門韋氏在經術
漢臣須時議歸前列天倫恨莫俱鵠原荒宿草鳳沼接
亨衢有客雖安命衰容豈壯夫家人憂几杖甲子混泥
途不謂矜餘力還來謁大巫歲寒仍顧遇日暮且踟躕

老驥思千里飢鷹待一呼君能微感激亦足慰榛蕪

增制唐白居易授庾承宣尚書右丞制曰昔我太宗文
皇帝嘗謂尚書丞百職綱維事一失中則天下有受其
弊者因命戴胄魏徵及杜正倫劉洎輩總領是職分居
左右職修事理人到于今稱之故吾前命崔從持左綱
今命承宣操右轄衆口籍籍頗稱得人況承宣端諒勤
敏周知典故必能為我紐有條之綱扼妄動之輪坐曹
得出入郎官立朝得奏彈御史決會政要扶樹理本無

俾戴魏劉杜專美於貞觀中可守尚書右丞散官勲如故 又授孔戣尚書左丞制曰尚書丞掌決百事樞轄

六曹晉魏以還右減於左惟有立者可以糾吏維無瑕者可以律人無以易戣往恭乃位可尚書左丞散官勲賜並如故 宋元厚之王右丞制曰朕循唐制復文昌府以令僕執國大政而丞為之貳禮優秩峻茲謂輔臣某亮直清明有猷有守服在禁近厥聞惟休茲用命爾以中大夫正秩於右轄於戲庶習雖逸法艱維初凡厥

有官弗祗弗迪亦惟朕政未發於中其能允諧時汝之
任往復朕命厥惟懋哉 又蒲左丞制曰某問學才猷
該洽通敏自朕識拔揚於禁嚴是用命爾以中大夫正
秩於左綱於戲若昔大猷訓迪在位時朕忱汝協濟茲
惟祗辟可以肅列曹惟若德可以熙庶績圖休於永冀
尚懋哉

增誥宋蘇轍劉摯尚書右丞誥曰漢御史大夫能任其
職則為丞相近世中執法議論不撓亦補執政昔我仁

宗優養正士開受直言時則有若包拯張昇之流咸以
敢言獲聞大政舊俗以遠此風寂寥容悅相承亦棄不
用朕追懷先正選建忠賢諤諤之聲庶幾前烈具官劉
摯早以御史少事裕陵力陳是非不避權寵十年流落
志氣不衰召置臺端首開正論進任中司之要屢聞白
簡之言風聲凜然國是以定朕欲試其行事之實是用
付以右轄之權治忽所關寄任尤重夫以言責人甚易
以義持已實難爾其勉之毋使輔政之功不若言事之

效

增表蘇轍謝除尚書右丞表曰渙汗之恩已行而不返
偃偻之志雖勤而莫伸上媿鴻私下慙公議恭惟皇帝
陛下接堯舜之統蹈成康之仁體貌先正耆老之臣揀
拔後來翹秀之士俛仰六載前後幾人坦然公明故不
私賢否之實穆然淵默故坐照情偽之真臨御久則鑒
愈明得失分則下無隱如臣者西南賤士章句小儒早
歲猖狂偶竊方聞之選中年流落既安縣尹之卑遭時

乏人致位近侍跌宕文墨之固嘒嘒議論之場舉皆空
言安有實效顧惟省轄之重實參國論之餘豈無遺賢
遽及微品地寒資淺何以望三事之餘光才短力罷安
能越六聯之滯論雖復黽勉就職媿歎何言此蓋伏遇
皇帝陛下天地之仁曲成草木之陋父母之愛不錄子
弟之非將建大厦以覆羣生故收衆材而無棄物然臣
負過其力受非所容惟有潔已無私或不孤於託付引
類自助幸得免於顛隳不渝始終少荅恩造 為樊左

丞讓官表曰伏奉制除臣尚書左丞寵命俯臨慙願自
失泛大鯨之海但覺魂搖戴巨鰲之山未如恩重臣聞
尚書百揆翬亮萬幾故天下尊北斗中樞陛下有南宮
左轄晉昇孔坦諒直當時漢拜楊喬閑練故事庶得百
寮有憚於會府諸侯取法於京師臣實謏才謬登清貫
握蘭起草昔紊朝經剖竹頒條近貽人瘼備厯中外無
聞聲庸版圖再緝貢賦未均於九州銅印更操威儀不
檢於三署次郎補缺豈易其人聖主求才宜難此受竊

謂苟求俊乂側訪瓌奇必使德合準繩言成網紀興化
致理時無間言況安上必在於薦賢危身莫踰於曠職
倘蒙垂收紫渙俯矜丹誠愚臣保陳力之言聖鑒有責
成之地

御定淵鑑類函卷七十四